

李文忠公奏稿

李文忠公奏稿

卷之九目錄

覆奏殷兆鏞等條陳江蘇釐捐摺

同治四年六月初一日

陳明租捐丈田清理民房情形片

同治四年六月初一日

軍需第二案收支款目摺

同治四年六月初一日

援閩蘇軍回滬摺

同治四年六月二十三日

帑利現未放徵籌款解應要需摺

同治四年六月二十三日

白齊文覆舟溺斃摺

同治四年六月二十九日

覆陳籌濟甘餉摺

同治四年七月二十二日

涂宗瀛請補江甯府摺

同治四年七月二十二日

覆保馮桂芬片

同治四年七月二十二日

向榮等所收釐金收支數目片

同治四年七月二十二日

淮揚鎮撥養馬灘地租片 同治四年七月二十二日

規復皖省營汛兵額片 同治四年七月二十二日

籌設織造機房摺 同治四年七月二十二日

置辦外國鐵廠機器摺 同治四年八月初一日

唐國華贖罪片 同治四年八月初一日

奏保李宗義等片 同治四年八月初一日

松滬舊案軍需款目摺 同治四年八月二十入日

揚鎮糧臺收支總數摺 同治四年八月二十入日

調楊鼎勳等軍赴徐宿摺 同治四年九月初八日

策保克復嘉興常州等城員弁摺 同治四年九月初八日

奏保王凱泰凌煥片 同治四年九月初八日

覆陳奉旨督軍河洛摺 同治四年十月初八日

江北新漕民折官辦摺

同治四年十月初八日

請飭議新漕全數解折片

同治四年十月初八日

徐屬冬漕循舊折價充餉片

同治四年十月初八日

李宗羲吳坤修請緩

陛見片

同治四年十月初八日

京營官弁學製開花礮子請獎摺

同治四年十一月初八日

海運回空沙船請免正稅摺

同治四年十二月初三日

龐際雲請准補鹽道摺

同治四年十二月初三日

張樹聲在營起復片

同治四年十二月初三日

上海裁撤會防局摺

同治四年十二月十九日

應寶時請補蘇松太道片

同治四年十二月十九日

王大經請准加鹽運使銜片

同治四年十二月十九日

李文忠公奏稿卷九

全集一之九

桐城吳汝綸編錄

同治四年六月初一日

覆奏殷兆鏞等條陳江蘇釐捐摺

奏爲欽奉

諭旨據實覆陳仰祈

聖鑒事竊

臣承准軍機大臣字寄同治四年五月十九日奉

上諭有人奏功臣宜知警戒請嚴加訓迪俾得保全等語據稱江蘇巡撫李鴻章戰功雖著而子惠未孚百姓之流離者未盡收恤地畝之荒蕪者未盡開墾不聞德政惟聞厚斂並以侍郎殷兆鏞前疏極言江蘇橫徵暴斂之害皆指李鴻章而言等語李鴻章自簡任江蘇巡撫以來疊克城池肅清全省厥功不爲不大惟以該省事同創始委用之人較多則流品易雜籌餉之途稍廣則民怨

易滋今軍務未竣待用孔亟抽釐之局自不能全行裁撤若如該侍郎所奏各捐未免太形瑣屑至官親幕友游客劣紳爭充委員擅用令箭旗牌等事紳董稍假事權擅作威福恐亦事所難免著李鴻章將不肖委員嚴加裁汰釐卡仍以歸併爲主俟軍務肅清再行次第撤裁另片奏江蘇各項捐款加以各項田捐歲可收銀四千萬兩等語江蘇捐款雖繁亦斷不能如所奏之多究竟可得若干如何開支著李鴻章造冊報部覈銷該撫受委任之重惟當體朝廷痾瘵在抱之念與民休息以期日臻上理以上各情有則改之無則加勉以無負諄諄誥誥之意原摺片並殷兆鏞摺均著鈔給閱看將此諭令知之欽此伏讀再四旣感我

皇上優容之厚

訓誨之殷又愧臣忝任疆吏以軍需爲急不能要結紳士致招物

議又自恨不守儒生愚拙之分謬附戰功叨竊太過盈滿致災惟
既帶兵不得不籌餉既籌餉不得不任怨殷兆鏞至以恃功股民
相譏又以歲收四千萬聳聽未免意存傾陷若非

聖主明鑒萬里洞燭隱微則當局爲難之苦衷無以自明後此辦
事之掣肘罔知所指中夜以思駭汗戰懼曷能自己但近年以來
廷臣奏請停減釐捐者不止一人不止一次而外省未有一處停
減豈督撫大吏皆不肖皆恃功耶亦事闕大局有所不容已也臣
早欲覆陳去冬准廣東督撫咨鈔會奏抽釐助餉熟籌利弊一摺
於本末源流言之最爲切盡而未聞

明詔如何指示茲奉

旨以軍務未竣待用孔亟釐局不能全裁是

聖明實已鑒及凡毛鴻賓等已陳各節臣固毋庸再瀆姑就江蘇

情形論之向稱財賦最盛以地丁漕糧鹽課關稅四者爲大宗自咸豐三年賊陷金陵江南北大軍雲集分兩臺供支蘇甯兩藩司進款各顧一面不相通融和春張國樑統兵七八萬人月餉五六十萬上海稅捐及蘇藩司丁糧正款已足敷用尙不借釐金之力而其時紳士把持議論紛繁當事亦未能認真興辦自蘇常疊陷僅存上海一隅藩庫丁漕絲毫無收薛煥招集兵勇四萬餘人僅資滬關稅項幸漢口九江尙未開關洋稅月收三十餘萬仍不足用乃擴充釐局以增益之臣於同治元年四月接署撫篆隨帶水陸各營僅及萬人將薛煥舊部裁汰簡練合之華爾常勝軍亦不過四萬人以入抵出欠缺無幾旋值漢九開關滬稅遞減僅足養洋兵及分濟鎮江一軍而臣軍攻勦日急添募愈多至二年夏閒水陸已增至七萬餘人餉無所措不得不專恃釐捐乃將滬釐大

加整頓並仿照上游楚軍辦法克復一處卽酌添卡局以濟軍需
商民僉謂官兵能殺賊救民無不踴躍樂輸鉅痛深之餘方有
好義輕財之舉蘇松被擾較輕生意尤旺故捐卡稍密常鎮蹂躪
最苦至三年四月克復常州後不再添釐局臣固斟酌行之非敢
任意操切此蘇省抽釐助餉之原委也凡有卡局處所臣均親歷
查勘於河湖扼要立總卡收捐於港汊紛歧立巡卡照票以杜繞
漏一徵一驗相隔或五七十里實無十里五里設卡重徵之事照
上海定章每千錢取三四十不等實無十錢抽三之事由浙滬
至蘇或捐兩次或捐三次按成本之輕重貨色之高下刊章共守
亦無綢緞須捐八九次木料須捐五六次之事殷兆鏞摺內所稱
茶棚桌子賭場桌子點心剃頭擔糞擔日捐數千文至數十文並
有妓女捐名色蘇省捐目雖多本由商賈繁盛貨物輻輳因地制

宜亦何至有此等荒唐之事造謠誣讟駭人聽聞不知其意何居
至所稱官親幕友游各劣紳爭充委員董事擅用令箭旗牌等事
前湖北撫臣胡林翼嘗言辦理釐捐須依唐臣劉晏之法引用士
人不使胥吏經手則弊端較少是以湖南北釐捐分濟本省及各
省征餉之餉爲日最長而功效最著由於擇人而用不專令候補
人員及地方州縣經辦臣初仿而行之無論本籍外籍但求廉勤
不苟者延請入局官親幕友實未充當此差游客紳士亦必審慎
擇取迨全省肅清或謂候補人員必須兼用於是外省員紳漸去
漸少臣督同總局司道明察暗訪一有弊竇立予參撤數年來奏
參咨革之案層見疊出未敢稍事姑容至今簡係行軍所用未聞
用之釐卡旗牌告示以曉諭商賈礮船弁勇以保護行旅亦無擅
作威福之事此蘇省釐卡辦法之大略也至有人片片奏江蘇各

項捐款加以各縣田捐歲可收銀四十萬兩等語奉

旨江蘇捐款雖繁亦斷不能如所奏之多究竟可得若干如何開支著造冊報部核銷仰蒙

聖慈洞鑒曷勝欽感查我

朝定鼎之初每年直省所入丁漕僅一千數百萬自乾隆六十年海內殷富鹽務關稅疊加整頓戶部所入每年多至四千餘萬嘉慶道光以後入不敷出至咸豐間每年例入之數十不及三四矣茲乃謂蘇省偏隅剝敝之餘能籌出乾隆盛時各省所入四千萬之巨款非獨不識時務且似不通掌故其正捐責人以學道不知彼之所學何道也查蘇省出入各款緣奉上年七月初十日

上諭各處辦理軍務未經報銷之案准將收支款目總數分起開列清單奏明存案免其造冊報銷臣即欽遵辦理業於本年二月

十七日將蘇滬軍需第一案收支款目開單具奏茲又將第二案
收支各款另摺陳奏均係實收實放毫無捏飾綜計先後單開如
釐捐一項自元年四月至二年六月止共收銀三百四十九萬餘
兩又另單自元年十月至三年六月止共收銀八十八萬七千餘
兩又自二年七月至三年六月止共收銀二百六萬二千餘兩此
其已報達部者計兩年有零共收釐捐銀六百四十餘萬數目不
爲不鉅江楚各省釐金每年各不過百數十萬茲於蘇松二百餘
里內歲收釐捐將三百萬辦事不爲不力自蘇杭金陵克復東南
腹地肅清商賈四散不盡聚於上海亦不盡走蘇境釐金日以減
色目今衰旺牽算月不過二十萬若如殷兆鏞所奏非惟不減反
從而日增月益果有增益何至收數轉絀耶至如何開支其三年
六月以前經臣分案逐款臚列固可一目了然嗣後當遵

旨報部彙銷獨念去秋以來金陵及各路兵勇陸續遣散臣軍將士亦未嘗不久役思歸蘇省紳商更莫不冀撤兵裁卡臣若乘機盡撤所部慰軍士凱旋之樂邀流俗免捐之譽而臣得解兵柄進退綽然未始非計之得者徒以餘氛未淨

厚恩未報一旦有警無以應

君父之急遂巡未決乃至今年奉

旨調蘇軍援閩三月奉

旨調蘇軍援淮徐五月奉

旨調蘇軍援直東事變發生強起立應計郭松林楊鼎勳八千餘人潘鼎新五千五百人皆雇用輪船航海遠征船價行糧軍裝各項格外驟費至三十萬兩而劉銘傳周盛波各軍一萬四千人轉戰皖北山東糧餉轉運弗絕於路其分防蘇境及金陵揚州徐州

內外江海淮河各處水陸各營又將近四萬人價餉不繼則譁議堪虞軍數不減於在蘇攻勦之時而費用轉倍於尋常有事之日徒恃釐捐養戰士出款增而卡局未增商民尙不甚怨殷兆鏞以蘇屬巨紳爲貴近之臣不以

國家大局爲念乃倡爲浮議肆口詆誣上以眩惑

朝廷之聽下以鼓動愚民之氣遠近傳播使有藉口以遂其背公藐法之私臣固不能不寒心以後官斯土者更無所措手矣旣荷聖明垂鑒臣當引疚自責隨時督飭甄汰委員酌量歸併卡局仍籌顧各路緊要餉需仰副我

皇上諄諄誥誡之意至所稱百姓流離未盡收恤地畝荒蕪未盡開墾此臣日夜疚心長太息者竊惟撫吳三年到處捐賑施粥施寒衣織具歲不下數十萬緡存活尙眾常鎮荒山太多今春遊委

員紳知府高梯簡川道府陳鼎等前往設局招墾由蘇籌發穀種
六萬石捐款六萬串農具十數萬約計十一縣中官墾民墾之田
新添百餘萬畝雨澤應時欣欣有生意江皖毗鄰災區且有聞而
募者臣實自愧惠政之未周仁心之未盡也抑臣更有請者臣由
海上用兵兼辦通商洋務稔知西洋各國兵餉足器械精專以富
強取勝而中國虛弱至此士大夫習爲章句帖括輒驚然以經
術自鳴攻訐相尙於尊主庇民一切實政漠不深究誤管理財之
道爲腴利妄擬治兵之人皆怙勢顛倒是非混淆名實論事則務
從苛刻任事則競趨巧僞一有警變張皇失措俗儒之流弊人才
之敗壞因之此最可憂我

皇上冲齡踐阼秉承

兩宮

皇太后聖訓攘除寇亂中興盛業必可馴致惟於用人聽言二端
推求實濟堅持定見務爲遠大之謀深維富強之術消內患杜外
萌蔑不由是臣雖憐愚無識幼讀父書早躋科第咸豐三年蒙
文宗顯皇帝派往軍營迄今十有三年飽歷艱難出生死身家
度外榮利泊然乃蒙

聖朝委任之隆

宵旰望治之切忍辱負重不敢自避嫌怨恆兢兢焉以軍實未充
民生未安爲懼要其設施無非爲公家籌畫絕無一毫自私自利
諒亦可以其見其聞現捻患方亟曾國藩督師在外後路籌餉籌
兵關係至要臣何忍別有希冀一俟捻賊蕩平撤軍歸農屆時有
以謝中外之責望庶無負

聖主始終保全之恩所有感激愧悚下忱據實披瀝覆陳伏乞

皇太后
皇上聖鑒謹
奏

陳明租捐丈田清理民房情形片

同治四年六月初一日

再前據蘇州善後局藩司劉郁膏臬司郭柏蔭等詳奉札開同治四年五月初二日奉

寄諭殷兆鏞奏蘇州前年畝捐四斗上年民間收租一石捐錢八百餘文甚至有不肖官吏私製步弓丈量浮增畝數著佃交糧者民房多被大小員弁霸佔原主來認輒稱入官等語江蘇被賊蹂躪最深新復地方瘡痍未起正宜休養生息以紓民力豈容不肖官吏肆行朘削重困吾民著李鴻章嚴密訪查如有前項情弊務當通飭所屬地方官嚴行禁革以拯遺黎而蘇民困原片著鈔給閱看等因欽此恭錄行司欽遵查辦該司等遵卽按照原奏檢查各案並就克復蘇省後情形詳析陳之伏查同治二年八月間蘇城未復之時據總辦團練刑部郎中潘曾瑋轉據局員周椿紳董

吳嘉椿等以親歷三縣鄉境除吳縣全境被踞外凡長元各鄉已
經克復者秋禾可望豐收因蘇城淪陷後各佃租籽或由土豪代
收或由偽職征收業戶則顆粒俱無向該官紳訴逃並求總局爲
之經理僉願今歲減收五成租息內以三分之一報捐軍餉又月
提善後撫卹經費該官紳察其情詞出於至誠議擬章程由潘曾
璋等具稟奉經據實

奏明開辦並以江震二縣情形相同委員一律辦理租捐凡成熟
田一畝共收佃戶租米六斗以二斗報捐軍米以一斗四升捐辦
撫卹以一升充辦公經費餘米二斗五升給還業戶計每畝共捐
出三斗五升並無所謂四斗之事其捐助軍食仍按戶請獎三年
九月因蘇州府屬十廳縣收成中稔奏仿上年租捐章程變通辦
理計長元吳三縣凡收租米一石捐錢八百文分上中下計成繳

捐此外各屬情形不同其酌量增減是數目本非一律惟江震
二縣因月籌修建

文廟經費由官紳會議每石加收錢七十文雖辦理未能劃一總
以俯順輿情為主並無嚴酷甚於催科之事卽所收數目以三年
收成及市價核計每石不過繳捐四分之一較之完納地漕錢糧
所省實多民情尙稱安貼惟素來短交錢漕之紳戶亦幾等於齊
民是甚於催科之說所由來此辦理租捐之大略也兵燹以後田
畝界址不清冊籍單串大半毀失不能不查辦清糧前經蘇紳馮
桂芬擬將各屬田地次第丈量先行試辦川沙乃清丈數月止得
萬畝查核所丈繪田圖說係將房基墳地池塘溝岸剔除不計實
田僅得七千有奇不及十分之八既與經界不符更恐虧短正課
馮桂芬擬以實丈數目爲準將額糧攤派通境必致大拂民情是

以詳明停止如有於清糧案內查丈者由各州縣督同本地紳董自行經理因之長洲等縣稟請頒給步弓當將存司之華亭上海及兩淮鹽場送到之弓飭發較準製造應用一面詳請咨部頒發如其私製八折小步弓希圖增溢畝數斷不能掩人耳目且查松太二屬閒有施丈之處已經竣事田數均尙相符並無增溢分毫此辦理丈田之大略也松江府屬同治二年冬漕據華婁青浦三縣因清糧尙未竣事在官冊籍不全責成圖董確查造冊代收佃租分別應完糧者由董代完應完租者由佃清交雖係偏重圖董亦卽著佃完糧之意行之一年尙無流弊同治三年冬漕金山縣仿照辦理並無貽誤此係暫時變通之法官民兩便惟素來抗欠漕糧之紳戶非其所願謗毀之興或由於此此著佃交糧之大略也至蘇城克復以後如撫卹難民資遣降眾等事均關緊要需費

孔多不能不先其所急而衙署毀爲平地廟宇亦多坍塌合城文武各員辦公之所軍火兵米製造各局屯住之處均不能不借資民房而民房中惟曾爲偽府者屋宇較多是經

奏明暫以偽忠王府爲巡撫衙署此外如織造暨藩臬兩司蘇糧道等亦權以從前偽府爲衙署因其規模均有僭越本非紳民所宜尙可暫時借居一俟衙署修復當按數發還飭令改作其餘各處議將賊匪改造屋料拆除充公仍將原有房屋及地基發還民戶管領或給價買作公所並無概令入官之說當蘇城初復時居民尙未返里所有無主民房由善後局代爲查封收管嗣紳民陸續來歸逐一清釐給領管業並恐兵燹之後民間產業易於混淆又各發印照俾資執守偶有兵民交涉爭訟卽分別查明押令遷讓迄今六門城內望宇對衡衙牙高啄牆垣窗戶整飭如初闌

喧闐爲各省新復地方所未有是蘇州民房一節各員弁實有清
理保護之勞閭閻受福不淺而迺一概抹煞目爲霸佔不以爲德
而以爲仇議論之不公莫此爲甚現復逐戶稽查房屋概歸原主
其武營大小員弁長元吳三首縣既在省需次之員大率商借民
房酌給租息藩司舊署已撙節籌款動工此外院司各署若同時
興復庫款既無可籌勸捐尤滋口實惟有隨時酌量情形陸續興
造俟二三年後可期漸復舊規此又籌修衙署之大略也總之蘇
城克復以後百事均同創始租捐一事尤於劣衿不便以致謠詠
繁興撫拾丈田估屋等事並以仿照賊匪辦法之詞侈口污巖冀

聒

天聽幸荷

聖明洞鑒僅予

敕令查禁所有實在情形自應據實具陳相應查案會同詳請據情覆

奏仍由該司等嚴密查訪如屬員中實有舞弊壞法擾累民生及紳士之包攬抗欠貽誤漕政者容隨時分別詳請參辦等情前來臣覆加查察均屬實在情形毫無浮飾此案臣在蘇撫任內接據司詳因續奉

寄諭殷兆鏞有條陳釐捐等事姑候彙齊覆奏所有查明蘇省田捐丈數及清理民房各緣由附片覆陳伏乞

聖鑒訓示謹奏

軍需第二案收支款目摺

同治四年六月初一日

奏爲蘇滬軍需第二案收支款目總數開列清單恭摺仰祈

聖鑒事竊准部咨同治三年七月初十日奉

上諭同治三年六月以前各處辦理軍務未經報銷之案准將收支款目總數分年分起開列簡明清單奏明存案免其造冊報銷等因欽此當經轉行欽遵旋據督辦報銷局蘇州藩司劉仰晉等具詳湘淮水陸各軍糧餉卹賞隨營文武官弁暨折采辦雜支製造戰船等項應分別正雜款目請自同治元年四月起至二年六月底止爲第一案自二年七月起至三年六月底止爲第二案當經酌定開報章程奏蒙

聖鑒業將蘇滬軍需第一案收支款目總數開列簡明清單

奏明存案奉

旨飭發戶部知道在案茲據該局司道等詳稱第一案清單實存銀九千九百三十一兩四錢八分三釐八毫八絲一忽錢二萬四千九百二十六千四百二十六文聲明歸於第二案接續開報又查太湖水師一軍係於二年七月間由皖抵滬自二年正月起先在皖省上游收支各款統歸此案彙總開報今自二年七月起截至三年六月底止提撥江海關庫並釐捐餉捐等項及皖省撥款共計收銀四百一十二萬四千五百九十六兩三錢六分五釐六毫四絲七忽錢二萬千文舊管新收統共銀四百一十三萬四千五百二十七兩八錢四分九釐五毫二絲八忽錢四萬四千九百二十六千四百二十六文據各委員將支放實數造報到局該司等胥飭局員逐款句稽悉心查核計第二案共請銷銀四百一十二萬五千四百一十九兩九錢七分四釐九毫三忽錢四萬三千

二百六十四千文實存銀九千一百七兩八錢七分四釐六毫二絲五忽錢一千六百六十二千四百二十六文以上實存銀錢統歸後案舊管接續開報所有收支銀錢各款係就實收實放之數開列詳請具

奏前來查同治二年六月迄三年六月正值軍務喫緊先後克復蘇州省城暨常州嘉興郡縣均在斯時而此一年中撥用關稅釐捐之數較前一年減至一百餘萬由於蘇杭收復商賈四散釐捐收數漸細賴蘇屬租捐陸續得銀八十餘萬兩稍資湊濟而放款力求節省月餉歷欠益多故雖營數日增軍需日夥而支用之數較前一年轉減數十萬此中竭蹶籌維實已不遺餘力茲據開報各款覆加確核委係實用實銷毫無浮冒應請存案免其造報除常勝軍等三款另行開單附

奏外合將蘇滬軍需第一案收支款目總數開列簡明清單恭呈

御覽伏乞

皇太后

皇上聖鑒謹

奏

援閩蘇軍回滬摺

同治四年六月二十三日

奏為援閩蘇軍由輪船航海陸續回滬現令暫紮鎮江休息再商調遣恭摺仰祈

聖鑒事竊福建陸路提督郭松林記名提督楊鼎勳等援閩之十六營臣曾奏調由閩繞赴江楚邊境攔頭扼剿續據閩浙督臣左宗棠以東省捻逆猖獗兵力宜厚閩中潰匪止存汪海洋一股該督已分派所部入贛州等處兼顧江楚應令郭松林楊鼎勳二軍回蘇候調剿捻於閏五月初五日奏明並咨行到臣疊奉

諭旨此案當經左宗棠飭委廈門員紳雇備輪船資送照料該兩軍於六月初間陸續由海道抵滬尙有三營在廈候船亦不日可到查皖北捻逆圍攻雒河集業經劉銘傳周盛波等趕到會同各軍痛剿解圍該逆分竄豫境趨向未定皖事大鬆接據郭松林等

文稱此次援圍各營崎嶇轉戰饑苦萬狀茲復冒暑遠涉重洋適
遇颶風顛簸觸受疫氣弁勇死於海中者數十人其餘亦十病六
七疲憊異常臣因檄令由滬拔隊西上暫紮鎮江城外加意休養
俾軍士元氣漸復一面修理鎗械整頓操練再會商曾國藩相機
調遣所有援圍蘇軍陸續回滬暫紮鎮江候調緣由理合由驛馳
陳伏乞

皇太后

皇上聖鑒謹

奏

帑利現未啟徵籌款解應要需摺

同治四年六月二十三日

奏為步軍統領衙門奏催兩淮帑利現未啟徵片行籌款解京以

應奉安大典要需恭摺仰祈

聖鑒事竊於同治四年六月十三日准步軍統領衙門咨開六月初四日奉

上諭兩淮應解步軍統領衙門本年初限利銀及積欠內所撥銀兩前經降旨飭催限於六月內如數解到現在絲毫未據交納亦並未咨報起程實屬膜視要需任意延宕著兩江總督嚴飭兩淮鹽運使務將本年初限應解利銀一萬八百兩及欠款內所撥銀三萬兩星速委員剋期起解統限於六月底一律如數解到不准再有積延等因欽此伏查從前兩淮鹽務盛時在京各衙門往往

奏撥銀兩飭發淮商生息以每年所入之利供京中辦公之需謂之帑利厥後離綱疲壞承領帑利之商類皆倒歇人亡產絕無可著追不得已而改爲按引攤徵軍興以後淮南未經開綱經前督臣將帑利等雜款奏請停解運庫不徵此銀已閱十數年之久臣前與曾國藩討論鹽務京中各衙門取資於兩淮之款爲數不少前此引岸虛懸無從設法今則運道無阻亟宜熟籌無如商酌再四總因鄰私未堵鹽釐未裁岸銷未暢卽如鄂湘兩岸向爲行銷最旺之區因川私粵私徧地侵灌各督撫借抽私鹽之釐以助軍餉不願查禁臣方量減淮釐以卹販酌輕售價以蔽私雖戶部飭加正課尙未輕率議增何敢將帑利雜款遽行列徵致啟各商藉口之端更滋各岸滯銷之慮是前項利銀運庫旣未啟徵委實無憑應解至原奏內稱如該運使一時難於籌解卽由藩庫無論何

項先行籌解等因似兩淮艱窘情形該衙門亦已洞悉奈運庫之
鹽課同微而濟庫之地丁亦細入不敷出彼此略同實屬無從湊
墊惟查步軍統領衙門奏提此款聲明九月內該衙門應派隨

扈旗營官兵修墊道路所需費用最關緊要

奉安大典非尋常辦公可比臣權衡事體之輕重不敢不於無可
設措之中作暫時通融之計擬在行營糧臺籌撥軍餉釐捐銀二
萬兩即日委員解京交該衙門兌收以應要需其兩淮裕利銀兩
應請

旨暫行免提俟軍務告竣准綱復額容再設法籌解所有步軍統
領衙門要需月行籌款起解緣由理合恭摺陳伏乞

皇太后

皇上聖鑒訓示再此案報解遲延前年查取現著兩淮鹽運使職

名先行交部議處現經臣查明係因利銀未經啟徵無從報解與
催收不力者有開所有該運使職名應請豁免開送合併陳明謹
奏

白齊文覆舟溺斃摺

同治四年六月二十九日

奏爲洋犯解至中途覆舟淹斃並懇將同時溺斃之解弁護勇營兵人等分別

賜卹恭摺具陳仰祈

聖鑒事竊漳州拏獲投賊洋人白齊文等三犯前經臣鴻章附片奏明請

旨飭下總理各國事務衙門議奏以該犯罪不容誅暫行嚴密監禁聽候嚴辦在案該犯被獲後卽解往福州省城監禁嗣有解蘇收審之議當由閩省派委干總賀光泰把總任尙勝隨帶護勇管解洋犯白齊文克令及細仔三名於五月初八日由閩起程行至江山縣清湖地方把總任尙勝因感冒病故卽由干總賀光泰率同護勇等押解前進臣鴻章先尙未接准咨會臣新貽於閩五月

十六日接據署蘭谿縣知縣江紹華稟稱閏五月初三日隄龍游縣兵役護送福建委弁千總賀光泰帶同護勇十名押解外國人犯白齊文克令細仔三名過縣當經照例分別點驗加派兵役雇船轉解以天氣炎熱人數眾多添撥幫船一隻分坐前進於初四日黎明一齊開船解赴下站去後詎於是日午刻據長解護勇唐聚泰等回縣報稱行至離城二十五里匯頭灘地方其時東南風正大灘高溜急水勢旋捲又值大水之後更加洶湧犯船甫經下灘忽被風水掀翻全舟覆溺同行幫船被水溜下趕救不及喊經就地居民漁船趕往救得護勇兵役九人所有賀千總及外國人犯白齊文克令細仔與護勇兵役船戶共十三人同時隨流飄溺當趕撥船役分頭撈覓卽於灘下河岸並石礮邊及施家灘等先後撈獲白齊文克令細仔屍身分別驗明給棺封識續於灘河下

流各處覓得護勇陳福堂營兵王以芹縣役胡福井千總賀光泰各屍身分驗明確經臣新貽委員馳往查明屬實臣宗棠亦接據稟報飭將現存之勇丁唐聚泰等八人資送回營先後皆會到臣鴻章臣等查白齊文營助粵西髮賊謀害中國按律久應誅殛此次仍敢潛入漳州內地投逆被獲本應立正典刑卽美國公使衛廉士亦有白齊文既經投賊已失體面美國不應庇護之語特以監禁聽候嚴辦經臣宗棠等委解蘇省收審實因閩中賊匪未平又距海口甚近設有疏虞關係非淺不料行至中途翻船溺斃雖中國未申治罪之權而該犯窮兇極惡致伏冥誅足見天道之不爽克令細仔二犯前經閩省審訊投賊是實亦有應死之罪惟中國護解弁兵勇役船戶無辜溺斃至十人之多由於今夏江浙一帶霖雨連旬山水暴漲而浙河灘高溜急風波險惡變起倉卒非

人力所能施該弁兵等因公死事實堪憫惻可否仰懇

天恩敕部將溺斃之守備銜千總賀光泰護勇陳福堂宋春益營
兵王以芹照例議卹其同溺之縣役船戶等六人由蘭谿縣查明
分別給與卹賞以免向隅至白齊文等三犯本有應得死罪既均
淹斃應毋庸議其英人克令一名前據英領事巴夏禮申陳請照
約交該領事懲辦臣鴻章本擬俟該犯解到按約轉交今既與白
齊文同舟覆溺事出意外只有付之命數設該領事等聞信之後
無理糾纏臣等必當據理駁辨相機妥辦隨時咨商總理衙門完
案白齊文克令屍棺二具聽由該國洋人領回細仔本係中國犯
屍卽由縣飭保掩埋其署蘭谿縣知縣江紹華尙非撥解不慎遇
救得生之護勇唐聚泰等亦非護救不力均請免其置議所有洋
犯中途淹斃情形並懇

恩將同時溺斃之解弁兵勇分別議卹緣由謹合詞恭摺由驛具

陳伏乞

皇太后

皇上聖鑒訓示謹

奏

覆陳籌濟甘餉摺

同治四年七月二十二日

奏爲援甘協餉業經按月撥解仍飭源源籌濟恭摺覆陳仰祈

聖鑒事竊承准軍機大臣字寄同治四年七月初七日奉

上諭劉蓉奏援甘協餉緊要請飭催各省迅解等語楊岳斌於行抵西安時先後由陝庫借撥銀六萬兩均議俟各省協餉解到時扣留歸款著李鴻章將揚防節省項下月解之三萬兩劉郁齋將江蘇月協之一萬兩趕緊委員撥解到陝由劉蓉轉運前進以濟要需等因欽此仰見

皇上廡念嚴疆急籌軍食之至意臣查此項協甘餉銀經營臣曾

國藩於閏五月初一日奏明撥定數目奉

旨允准在案先經陝甘督臣楊岳斌派委訓導彭登焯來江守提自五月起至七月揚防節省項下共應解銀十二萬兩歷經曾國

藩及臣督飭江藩司淮運司等先後籌撥清款飭由該委員解交
湖北後路糧臺轉解楊岳斌軍營投收其江海關每月應撥之一
萬兩亦飭蘇松太道丁日昌竭力籌撥昨又委解二萬兩由護撫
臣劉郁膏附片奏明按月勻濟不至缺誤至都興阿甯夏軍餉欽
奉開五月二十日

寄諭飭臣等由應解協甘兩淮鹽課內月撥銀二萬兩徑解都營
照數劃除查揚防節省項下前奏明撥定甘餉三萬兩本指運庫
協款及江北釐金運庫人不敷出情形昨經會國藩會同臣等於
緩解漕折案內分晰具奏此項同一協甘餉銀同一撥動鹽課斷
不能於認定三萬外再籌鉅款而楊岳斌委員守領轉解尤甚便
捷現楊岳斌已抵督任甘省軍餉自應由該督通籌勻撥應否分
解之處已咨請楊岳斌自行商定至每月議定協款嗣後無論如

何支絀臣仍督飭司道源源籌濟以顧要餉而慰

聖廑所有甘餉業經按月撥解緣由理合恭摺山驛覆陳伏乞

皇太后

皇上聖鑒謹

奏

涂宗瀛請補江南府摺

同治四年七月二十二日

奏爲揀員請補江南鎮江要缺知府恭摺具

奏仰祈

聖鑒事竊照留署江南府知府鄭濟美殉難開缺前經督臣曾國
藩會同臣鴻章查明奏請

簡放同治二年十一月初五日奉

上諭江蘇江南府知府員缺緊要著該督撫於通省知府內揀員
調補所遺員缺仍著李仲良補授欽此緣軍務倥偬揀調未能得
人是以久未覆奏查江南府本係衝繁難省會要缺被賊陷踞十
二年之久爲東南收省劫運最深之地上年甫經克復城鄉一片
榛蕪各屬流亡殆盡辦理善後百事草創非躬親民事能耐艱苦
之人斷難勝任曾國藩移駐江南卽經奏請以候補直隸州知州

涂宗瀛署理迄今任事將及一年於招集流民查辦保甲督理工役撫恤招墾各政均能有條不紊日見起色省城善後該員經手事件最多亦最妥洽無須遞易生手臣等於通省知府內逐加遴選亦無堪調之員查涂宗瀛年五十四歲安徽六安州舉人同治元年大挑一等奉

旨以知縣用籤掣江蘇經曾國藩留營差委於會克高漕溧水東壩案內出力保奏同治三年六月初四日奉

旨著免補本班以直隸州知州仍留江蘇補用旋委署斯缺該員廉幹樸誠慈惠耐勞深識治體先於同治二年十一月經曾國藩奏保賢員以備器使摺內聲明涂宗瀛踐履篤實治官事若家事是月二十日奉

寄諭已月交軍機處存記候旨錄用等因欽此以之擢補江甯府

知府於極苦災區可期逐漸整頓惟與例未符而人地實在相需
例得專摺

奏請合無仰懇

天恩俯念新復省會員缺緊要

特旨准予破格擢用卽以江蘇候補直隸州知州涂宗瀛升補江
甯府知府實於政治民生均有裨益如蒙

俞允卽無遺缺可補其兩次奉

旨補授江甯府遺缺之李仲良前曾委署常州府知府辦事實心
操守端謹現查有鎮江府知府周楫瑞病故遺缺亟應請

旨簡放據藩臬兩司詳委該員前往接署可否請

旨卽以李仲良補授鎮江府知府亦於要缺有裨謹合詞恭摺具

奏伏乞

皇太后

皇上聖鑒訓示施行謹

奏

覆保馮桂芬片

同治四年七月二十二日

再承准軍機大臣字寄七月初三日奉

上諭在籍中允馮桂芬才識若何品行有無可取李鴻章自必知之甚悉著卽據實奏聞等因欽此臣在翰林時卽與馮桂芬相識服其學問精洽及統兵至滬復經

奏留臣營藉資贊助隨時諮訪地方利病嗣於上海設立外國語言文字館及請減蘇松太等屬漕糧皆采其議居多該員好學深思博通今古喜爲經世之學綜其所長於鹽政漕務尤爲洞悉源流惟持論務求刻覈不無偏倚洋務機要研究亦深前督臣李星沅陸建瀛撫臣許乃釗徐有壬歷經延請入幕並襄辦鹽務及協濟籌餉諸局以本籍紳士與聞公事未免易招物議現主講蘇州書院專於閉門授徒雖年近六旬精力稍衰究其品行實爲醇正

而識略宏通學有本原在江蘇紳士固不多得卽近時詞臣似亦罕有謹就臣所知據實附片覆陳伏乞

聖鑒謹

奏

向榮等所收龍金收支數目片

同治四年七月二十二日

再據總辦前江南大營糧臺報銷候補道王曾樾詳稱奉准部咨同治三年七月初十日奉

上諭同治三年六月以前各處辦理軍務未經報銷之案准將收支款目總數分年分期開列簡明清單奏明存案免其造冊報銷等因欽此遵查前大臣向榮先於咸豐四年十月間附奏余萬清在於鎮江三江營設卡抽釐爲募勇經費賞卹等用藉以捍衛蘇常復於東壩南渡丹陽等處試辦捐釐以作水陸諸軍打仗犒賞並師船加給口糧添募水勇划船等項經費由營派員專司收管支發分別咨照糧臺併入三江營釐項彙案造報亦於五年八月間奏明在案所有此項釐金收管支發悉由營中經理並不知會糧臺嗣經營務處游擊李春寅專管釐金委員陳化儒林昌鈺等

造報東嶺南渡丹陽等處自咸豐四年十一月五年正月先後試
辦起截至六年五月初八日止共計解收錢洋合銀一十八萬五
十六兩六錢七分六釐內於五年十月撥解廬州軍營協濟餉銀
五萬兩其支發上游師船加給口糧添募水勇划船等項銀四萬
一百二十二兩六錢三分三釐其餘銀八萬九千九百三十四兩
四分三釐奉前大臣向榮總統諸軍江南提督張國樑隨時犒賞
之用又准幫辦江南軍務雲南鶴鹿鎮總兵余萬清造報三江營
自咸豐四年八月十六日起截至七年正月月底止共收錢合銀一
十三萬九千八百八十四兩二分二釐內撥解金陵大營協濟犒
賞共銀四萬兩其支發忠義等勇口糧等項銀九萬九千八百八
十四兩二分二釐聲明無存各等因合將前二項釐金查照營冊
造報收支數目開單詳請附

奏存案免其造冊報銷等情前來理合照繕清單恭呈
御覽伏乞

聖鑒謹

奏

淮揚鎮撥養馬灘地租片
同治四年七月二十二日

再查河標中軍副將衙門經前河督臣庚辰

奏明酌撥洪湖淤灘五十頃作為養馬灘地由營經理充費上年
因河標中軍副將員缺裁汰復經漕督臣吳棠以此項灘地原丈
界址迷失卽將該地內原尾草灘一併丈量撥給實計地七十五
頃零七十畝三分五釐五毫奏請撥歸新設淮揚鎮標所屬之中
營接管在案茲據淮揚鎮總兵歐陽利見稟稱淮揚添設總兵本
因裁撤河標中軍副將而設此項灘地每年約計租錢七八百千
文從前旣歸河標中軍副將衙門充費此時改立總兵自應仍歸
總兵衙門經管況淮揚鎮統轄改操各營一切公用較繁時形竭
歷請將河標養馬灘地七十五頃零七十畝三分五釐五毫撥歸
該鎮衙門經理收租藉充所轄各營及本衙門一應公費俾符原

案等情前來臣查淮揚鎮員新設公用無資該鎮本係由河標中軍副將改設據請以河標衙門養馬灘地撥充淮揚鎮標公費之用尙與原案相符除批飭遵照外理合附片陳明伏乞聖鑒敕部知照謹

奏

規復皖省營汛兵額片

同治四年七月二十二日

再安徽省綠營兵丁共十八營向設馬步戰守額兵九千四百二十四名內惟宿州一營歸徐州鎮兼轄前經漕臣吳棠奏准暫留全額其餘十七營應歸撫臣暨皖南壽春兩鎮分轄軍興以來弁兵散亡殆盡其留存各屬城汛者皆係零星孱弱之兵經督臣曾國藩撫臣喬松年於上年二月會奏裁撤請俟軍事大定次第募補以實營伍在案日下皖南北漸就肅清巡緝鎮撫責在綠營分汛設防未可久任懸曠臣等往返咨商擬自本年為始先行募補守兵五成照例籌給糧餉俾資地方彈壓之川俟田野漸闢錢糧盡徵客兵防勇全撤再分年酌飭募補足額遴派鎮將認真選練總視歷年庫款之盈虛為招復兵額之次序至額兵估餉事宜另飭藩司衙門查核向章分晰議詳由撫臣續行奏辦惟皖南鎮總

兵係咸豐五年新設之缺當因地方被擾日事戰爭鎮標營制至今未暇議及茲奉

諭旨皖南安謐總兵作為額缺該鎮標下除徽甯池廣蕪采各營須歸統轄外應否添立幾營抑或酌改增定之處以及官弁兵丁人數俸薪馬乾口糧章程是否即照壽春鎮標例定成額相應請

旨敕部分別核議具奏俟該部行文到臣再行遵照會商辦理所有酌籌逐漸復皖省各營汛兵額緣由會同安徽撫臣喬松年附片具陳伏乞

聖鑒訓示謹

奏

籌設織造機房摺

同治四年七月二十二日

奏爲大運緞綢礙難購買現籌設局房試辦開織恭摺仰祈
聖鑒事竊查本年戶部內務府派辦大運緞綢等項按照市價估
計約需料工銀十餘萬兩均經奏明定限解交督臣曾國藩前因
織局尙未設立請援案由江藩庫先撥銀二萬兩交織造酌量購
辦奏蒙

俞允在案

臣祥佑到任後應卽遵照辦理當飭司庫松齡筆帖式

德善吉順庫使景禱榮裕等帶同熟諳書吏察訪市價去後旋據

稟稱江甯久遭蹂躪甫經克復尙無大商設局開織且

上用倭緞大緞部用龍蟒粧緞等款花樣顏色尺寸半多民機所
無竄屬無從采買惟春綢紡絲產自蘇杭尙堪購辦又據江藩司
文稱江甯所屬徵解錢糧向歸揚營糧臺提充軍餉藩庫並無存

銀本年揚防撤後此項節省錢糧尙須歸還上年揚營所借解部
漕價並支放旗綠各營坐餉核計實屬不敷所有奏撥織造料工
銀二萬兩祇可陸續籌解各等語是采買固屬爲難而籌款亦殊
不易也臣等以爲采買本權宜之計旣多窒礙難行而設局實久
遠之謀自應酌量趕辦惟江甯城西華門內外常府街尙設織局
三處鋪機六百餘張經亂以來片瓦無存機具亦盡毀失當此經
費極絀於奏撥辦運之款尙形竭蹶若議修復局房從何措手臣
鴻章再三籌度惟有另覓城中空屋將三局蠶倉庫歸併一處於
變通之中寓撙節之法因飭善後局員擇地勘屋在珠寶廊地方
購得民人李端住宅一所尙存樓房三十餘間前臨內橋河水便
於漂絲移置織局最爲合宜現經籌款鳩工就兩旁餘地添蓋機
房五十間倉廩五間計每間設機二張新添房屋可設機百張自

下機匠之回籍者僅有數百名倉厥五閒亦可敷用仍俟款項稍裕徐議擴充擬此後織造各局卽改置於珠寶廊不再移回西華門等處而舊時織局基址亦可留作別項公所至養匠口糧例由上江之無爲等州下江之六合等縣解到屯米內歲撥一萬石以資散放上年六合縣冬消未經啟徵安省又剔荒徵熟暫收折價是以曾國藩原奏匠役一項併歸月撥津貼經費銀一千兩內開支臣祥佑查此項銀兩養廉薪資出其中書吏紙張飯食出其中而匠米又出其中實屬不敷支發商之臣鴻章擬俟開機織辦時查明機匠實存名數仍飭江藩司於安省屯米折價內按月酌撥其應用機張則曉諭回籍機匠廣覓舊機量給賞銀損壞者修整短缺者添置所需當不甚費現在珠寶廊局屋已於六月二十五日動工十月內約可工竣計藩庫所撥料工價銀屆時亦可陸續

籌解臣祥佑當趕緊采辦絲斤挑造花木倭緞大緞等項先儘民
機所無者織辦其春綢紡絲之尙可采買者仍視撥款之多寡量
加采買雖本年乙丑大運不能照數依限解交而織局粗立之後
當漸起色所有大運緞綢礙難購辦擬請設局另試辦開織緣由
謹繕摺合詞具奏伏乞

皇太后

皇上聖鑒訓示謹

奏

置辦外國鐵廠機器摺

同治四年八月初一日

奏爲置辦外國鐵廠機器併局製造並飭奉派京營弁兵分起到廠學習恭摺具陳仰祈

聖鑒事竊自同治元年臣軍到滬以來隨時購買外洋鎗礮設局鑄造開花礮彈以資攻剿甚爲得力上年春間蒙總理各國事務衙門函詢學製各種火器成效何如當卽詳細具覆以短炸礮與各種炸彈均能製造其長炸礮及洋火藥非得外國全副機器不能如法試造現亦設法購求以期一體學製至於各項運用之妙與洋人之貴重此器暨日本視中國之強弱以爲向背各情形亦推闡陳明經總理衙門鈔函恭呈

御覽並以臣函中所言慮患防微與該衙門所籌適相符合宜趁南省軍威大振洋人樂於見長之時將外洋各種機器實力講求

期得盡窺其中之秘有事可以禦侮無事可以示威等語於同治三年四月二十八日奏蒙

諭旨飭由火器營派撥護軍參領薩勒哈春等官兵四十八員名到蘇經臣酌派在丁日昌韓殿甲及洋人馬格里等三局分習製造專摺覆

奏在案查製造船礮軍火各種機器有通用者有專用者若買製齊全須數十萬金雇覓中外匠工采購外洋銅鐵木炭等料亦需費不貲臣處所設西洋礮局其機器僅值萬餘金不全之器甚多只可量力陸續添購以求進益前由曾國藩派人赴英美各國探訪該處船廠機器實價臣並議及此物若託洋商回國代購路遠價重既無把握若請派弁兵徑赴外國機器廠講求學習其功效迅速與利弊輕重尤非一言可決不若於就近海口訪有洋人出

傳鐵廠機器確實查驗議價定買可以立時興造進退之權既得自操尺寸之功均獲實濟擬飭海關道丁日昌在滬訪購如製器之器已可購得若干仍應添補若干或宜另擇安口試辦容通盤籌議略有端倪方可入

告以上各情均經節次由陳總理衙門一面飭訪購辦此臣處前此議辦鐵廠機器之原委也又去年十二月初九日欽奉

寄諭昨據御史陳廷經奏綠營水師廢弛請飭整頓營伍製造軍火一摺著曾國藩李鴻章會同商酌奏明辦理原摺著鈔給閱看等因欽此遵查原奏所議軍火一節大意以夷情叵測恃有戰艦機器之精利逞其貪縱然彼機巧之器非不可以購求學習以成中國之長技請於廣東等處海口設局行取西洋工匠置造船廠以期有備無患等語雖語焉不詳未得要領而大致與總理衙門

既臣所籌議不謀而合曾國藩平時亦持此論自應遵

旨商酌辦理茲據丁日昌稟稱上海虹口地方有洋人機器鐵廠一座能修造大小輪船及開花礮洋鎗各件實爲洋溼浜外國廠中機器之最大者前曾問價該洋商案值在十萬洋以外是以未經議妥茲有海關通事唐國華歷游外國多年熟習洋匠本年因案革充贖罪情急與同案已革之扞手張燦秦吉等願共集資四萬兩購成此座鐵廠以贖前愆廠內一切機器俱精所有匠目照舊發價任憑遷移調度其餘廠中必需之物如銅鐵木料等件均值銀二萬兩由該關道籌借款項給發采買以資興造先行請示前來當查唐國華一案既情有可原報效軍需贖罪亦有成案可援此項外國鐵廠機器覓購甚難機會尤不可失批飭速行定議稟候分別具

奏並飭該廠一經收買卽改爲江南製造總局正名辦物以絕洋人覬覦其丁日昌及韓殿甲舊有兩局卽歸併總局一切事宜責成該關道丁日昌督察籌畫會同總兵韓殿甲暨素習算造之分發補用同知馮煥光候選知縣王德均熟諳洋軍火之候選直隸州知州沈保靖一同到局總理所有出入用款收發器具稽查工匠分派委員數人各司其事分飭遵照去後旋據丁日昌等查造該廠機器物料件數清冊擬具開辦章程約有數端一核計局用房租薪水及中外匠工等有定之款月需銀四千五六百兩其添購物料多寡不能預定大約每月總在一萬兩以外一查原廠所用之洋匠計留八人其匠目科而一名技藝甚屬精到所有輪船鎗礮機器俱能如法製造現擬於華匠中留心物色督令操習如有技藝與洋人等者卽給以洋人工食再能精通則拔爲匠目以

示鼓脚一現造洋鎗器具尙未全備已令匠自起製全副約大小四十餘件數月可以成功如式仿製卽省功力惟已製洋鎗則必需銅帽既得銅帽又必需洋藥皆係相因而至之物不容偏廢但聞製藥機器工料尤爲繁重容再設法購求俾可推行盡利一查鐵廠尙以修造大小輪船爲長技此事體大物博毫釐千里未易累長較短目前尙未輕議興辦如有餘力試造一二以考驗工匠之技藝其鋸錢織布挖河犁田諸器雖可仿製但其法式同中有異觸類引伸尙須考究尤當權其輕重緩急庶不致凌躐無序一前奉議飭以天津拱衛

京畿宜就廠中機器仿造一分以備運津俾京營員弁就近學習以固根本現擬督飭匠目隨時仿製一面由外購求添補但器物繁重非窮年累月不能成就尙須寬以時日庶免潦草塞責一查

本廠現在虹口每年房租價銀六七千兩實爲過費兼之洋涇浜
閘俗繁華游藝者易於失志廠中工匠繁多時有與洋人口角生
事均不相宜應請擇地移局其他所議如機器宜擇人指授工匠
不令隨意去留費用宜實報實銷賞罰宜明定章程以上各條均
屬切實臣查此項鐵廠所有係製器之器無論何種機器逐漸依
法仿製卽用以製造何種之物生生不窮事事可通目前未能兼
及仍以鑄造鎗礮藉充軍用爲主月需經費容臣隨時於軍需項
下通融籌撥如將來各種軍器仿造洋式造成取攜甚便卽可省
購買洋軍火之費上海虹口地方設局於久遠之計殊不相宜稍
緩當籌款另建房屋移至金陵沿江偏僻處所以便就近督察曾
國藩采辦西洋機器俟到滬後應歸併臣處措置至前次派在丁
日昌韓殿甲兩局之護軍校達隴阿等四員京營兵二十名已飭

入廠學習其儘先參領薩勒哈春副參領崇喜等所帶弁兵本在蘇州西洋礮局該局機器與上海鐵廠亦自同源仍可互相觀摩惟此事形下不離形上與規矩不能與巧將來各弁兵所得之淺深恐難以一例繩也機器製造一事爲今日禦侮之資自強之本總理衙門原奏言之甚詳已在

聖明洞鑒之中抑臣尤有所陳者洋機器於耕織刷印陶埴諸器皆能製造有裨民生日用原不專爲軍火而設妙在借水火之力以省人物之勞費仍不外乎機括之牽引輪齒之相推相壓一動而全體俱動其形象固顯然可見其理與法亦確然可解惟其先華洋隔絕雖中土機巧之士莫由鑿空而談逮其久風氣漸開凡人心智慧之同且將自發其覆料數十年後中國富農大賈必有仿造洋機器製作以求利益者官法無從爲之區處不過銅

錢火器之類仍照向例設禁其善造鎗礮在官人役當隨時設法
羈縻耳天下至奇至異之事究必本於平常之理如或不然則推
之必不能遠行之亦不能久陳廷經原奏以中國修造鐘表推之
於機器雖有精粗大小之別可謂談言微中中國文物制度迥異
外洋狻狂之俗所以郵治保邦固丕基於勿壞者固自有在必謂
轉危爲安轉弱爲強之道全由於仿習機器臣亦不存此方隅之
見顧經國之略有全體有偏端有本有末如病方亟不得不治標
非謂培補修養之方卽在是也如水大至不得不繕防非謂濟川
澮經田疇之策可不講也事無鉅細樂成固難而圖始尤不易自
來建一議興一利勞臣志士纏膝而經營之及乎習之既久相安
於無事或幾不察其所自來而追溯創議之初於此中難易得失
之數幾經審慎曷敢鹵莽而一試哉臣於軍火機器注意數年督

飭丁日昌留心訪求又數月今辦成此座鐵廠當盡其心力所能及者而爲之日省月試不決效於旦夕增高繼長尤有望於方來庶幾取外人之長技以成中國之長技不致見絀於相形斯可有備而無患此則臣區區愚誠之所冀幸者也除唐國華贖罪一案月片附奏並咨總理衙門外所有置辦外國鐵廠機器併局製造並京營弁兵分廠學習緣由謹會同協辦大學士兩江總督臣曾國藩恭摺由驛具

奏伏乞

皇太后

皇上聖鑒訓示謹

奏

唐國華贖罪片

同治四年八月初一日

再前據江海關道丁日昌查出新關已革通事捐職唐國華等私收陋規詳請革訊經臣在蘇撫任內附片具

奏同治三年十一月初二日奉

旨唐國華著卽行斥革嚴訊究辦該衙門知道欽此當卽恭錄行關欽遵會同臬司嚴訊詳辦旋據總稅務司赫德申稱以上海華商貿易半係自雇洋船立具合同並保險憑據必託通事代爲緝譯洋字由華商自行酌送銀兩酬勞似有可原之情呈祈查核辦理又據職員鄧玉樵等稟稱唐國華之母譚氏以伊子曾在外國多年深知外國鐵廠能製造鎗礮輪舟等物現當軍務未竣誠爲有用之具邀同秦吉張燦願行勉辦鐵廠一座報效冀贖子愆哀求代達各等情先後飭發該司道等按照稟各情節確實查訊

茲據署江蘇臬司王大經江海關道丁日昌會核議詳前來緣唐國華係廣東香山縣人咸豐九年在福建報捐州同職銜同治元年在上海新關充當通事兼緝譯洋字公文總理進出稅單張燦係浙江鄞縣人秦吉係上海縣人均於同治元年投充上海新關并手分司并查出進口貨物是年七月初旬因華商每遇洋船裝貨所議合同及水腳總單並洋行保險憑據均係洋字華商往往不能辨識屬託唐國華緝譯偶然送給銀兩酬勞續因緝譯較多並因到關納稅應給稅單妥速遂各相沿送銀酬謝張燦奏請分司并查出進各口貨物凡遇華商貨船到關隨時并查不令守候亦各願酌送洋錢與唐國華情事相同約計唐國華每節收受紋銀二千兩張燦秦吉每節約計各收受洋錢七百元三年六月丁日昌到任訪聞禁止詎至中秋節各商仍送唐國華規銀一千九

百八十三兩送張燦洋錢六百九十元秦吉洋錢六百八十元經
該關道查出詳

奏革訊飭發上海縣知縣王宗濂提案研訊供悉前情不詳詰係
販貨出進關口華商自行致送先係按貨計算致有包件費名目
並無刁索訛詐情事復經該縣訪查此項規費致送緣由與總稅
務司赫德所陳大略相同詳由該司道等查訊無異至報效鐵廠
一節查此項鐵廠前經商辦多時均爲洋人阻難唐國華曾在外
國多年與領事商人熟悉其贖罪情急與張燦秦吉合出重資購
成報效將來洋礮洋鎗火箭及一切機器均可由廠自造於時事
大有裨益其歷次收受規費卽按律坐贓論罪止滿徒查定例
自斬絞以至徒杖均有納贖明文是

國家慎用刑章原有贖鍰之典茲唐國華出銀二萬五千兩張燦

秦吉各出銀七千五百兩共銀四萬兩合辦洋鐵廠一座核與納贖之例相符查唐國華總計得受過銀一萬三千九百兩零張燦秦吉總計各得受過洋錢合銀三千兩現在所出之數除將各名下得受規費照例追起外所餘之銀尙逾於贖罪之數應請將唐國華張燦秦吉准予寬宥免其治罪庶於情法兩得其平唐國華居心貪鄙前革職銜應不准其開復追起實收戶請咨銷並與張燦秦吉一體革役並聲明唐國華係州同銜前次請革同知職銜係因該犯錯供所致今已更正等情會詳請

奏前來臣查唐國華等均係在關人役輒敢收取規費有干例禁惟核其情節尙與訛詐需索者有間總稅務司赫德亦稱情有可原自屬在關親悉情由不妨代爲陳明本可稍予末減且集貲至四萬兩購成鐵廠以資製造尤與報效軍需贖罪成案相符辦理

尚非寬縱此案應候

奏咨議結緣該項鐵廠機器交涉外洋未便遲延致滋謬為已先飭驗收具報除置廠併局事宜另摺具

奏並咨總理衙門外所有已革道事唐國華等一案擬在贖罪緣由理合會同護理江蘇巡撫臣劉郁齋附片具陳伏乞

聖鑒訓示謹

奏

奏保李宗羲等片

同治四年八月初一日

再江甯藩司爲稟下河各州縣錢糧總匯察吏安民均關緊要其
江甯府屬殘破尤甚招墾撫卹百廢待興籌款非易前敵勦擒各
軍暨南北分防兵勇餉需浩繁應由臣督同該司量入爲出勉力
籌顧非情形熟悉才識素裕之員難期勝任查有留署兩淮鹽運
使安徽按察使李宗羲四川進士由安徽知縣洊升今職廉正和
平能持大體總理鹽務及江北釐局均有條理江省利病講求較
熟可否容臣調署江甯藩司以資臂助至兩淮運司正當推廣運
路整飭場電經辦必須得人前奉

寄諭飭

臣國藩酌保堪勝運司人員

臣鴻章接署督篆曾面與商

議查有三品頂戴蘇松太道丁日昌廣東廩貢由江西直隸州調
營當差嗣擢任海關道籌辦洋務撫綏商民實力整頓不避勞怨

操守亦甚清嚴昨因病請假調理計可就痊上海洋務現有通商
隨員升用道應寶時代理關道本是熟手可期措置得宜又按察
使銜廣西補用道程桓生安徽拔貢咸豐四年由廣西知縣調赴
臣國藩軍營相從最久操履廉潔深耐勞苦上年江路暢通經臣
國藩分派大員赴楚西各岸籌運淮鹽程桓生辦理江西督銷局
銷數較旺釐餉賴以接濟鹽務利弊均所洞悉又現署江安糧道
遇缺卽補道李鴻裔四川舉人由兵部主事調營差遣經臣國藩
於同治二年十一月間奏保賢員以該員襟度軒豁敏而能精欽
奉

寄諭交軍機處存記錄用上年委辦江甯善後局督理工程綜核
細密才略明練以上三員均堪擢用伏乞

聖鑒采擇施行謹會同協辦大學士兩江總督臣曾國藩合詞附

片具
奏

松滬舊案軍需款目摺

同治四年八月二十八日

奏爲查明松滬舊部軍需收支款目總數開列清單恭摺奏報仰

祈 聖鑒事竊准部咨同治三年七月初十日奉

上諭同治三年六月以前各處辦理軍務未經報銷之案准將收支款目總數分年分起開列簡明清單奏明存案免其造冊報銷等因欽此當經轉行欽遵旋據蘇省報銷局司道將湘淮水陸各軍糧餉等款分別正雜酌議開報章程聲明松滬舊部兵勇糧餉等款并上海原設軍需製造各局應截至同治元年十月初三前兼署藩司蘇松太道吳煦交卸前一日止歸該道另案開報等情並經督飭該司道將蘇滬軍需第一案第二案收支各數先後開單奏蒙

聖鑒各在案茲據原辦松滬軍需前兼署蘇藩司蘇松太道吳煦詳稱上海辦理防勦自咸豐十年二月起截至同治元年十月初三該道交卸司篆前一日止經前撫臣薛煥奏准動撥江海關稅並各局釐捐抵用共計收銀四百四十四萬六千一百八十二兩一錢二分六釐五毫五絲錢三十六萬五百九十二千三百三文米二千四百六十石據各委員將支放實數分晰開報該道逐款句稽其計請銷銀五百五萬一千五百四十四兩四錢一分三毫錢三十六萬七千一百六十一千二百五十四文米二千四百九十四石八斗一升八合五勺計不敷銀連錢米折價共墊欠銀六十七萬九千五百八十二兩二錢六分一釐二絲五忽內除初案銷冊列墊銀十八萬一千三百八十七兩八錢一分四釐六毫四絲八忽業奉戶部奏准勸捐歸補外實計墊欠銀四十二萬八千一百

九十四兩四錢四分六釐三毫七絲七忽擬請援案給發餉票片
文附詳各等情詳請具

奏前來臣查松滙舊部各軍始於咸豐十年二月其時浙江省城
初次失守賊氛密邇上海卽辦防堵未幾金陵大營潰退蘇常松
太各屬相繼淪陷該逆屢以大股圍撲上海軍務十分喫緊節經
前撫臣薛煥督飭該道添募勇弁雇用外國兵官教練常勝一
軍購置外洋鎗礮軍火竭力防勦兩次克復松江府城分防金山
寶山等處增兵愈多需餉益鉅十一年冬杭州復陷浦東四廳縣
概被賊踞僅膜上海一隅之地局勢尤爲危殆迨同治元年三月
臣統皖師東下將松滙各防兵勇分別裁汰歸併以次進攻始得
逐漸廓清是前次上海防勦俾保餉源重地均屬實在情形先經
前撫臣薛煥奏明責成該道吳煦經理軍需准於司關各庫動支

應元元年四月復經臣奏明責成蘇藩司督辦支放報銷時該道兼署藩司亦仍一手經辦第當逆氛環擬高買星散地漕絲毫無徵釐稅旺衰無定綜計收支不敷出設法挪墊亦誠不得已茲據開報各款覆加確核均係實用實銷並無浮冒應請存案免其造報除常勝軍等三款暨墊欠原委分別另行附

奏外合將松滬舊部軍需收支款目總數開列簡明清單恭呈御覽伏乞

皇太后

皇上聖鑒至咸豐十年二月起至是年十二月止松滬軍需收放各款曾由該道作為初案造冊咨呈到部在同治三年七月初十日欽奉

恩旨以前當經戶部奏請將銷冊暫行存案仍飭一併列入清單

奏
等因現係遵照辦理合併聲明謹

揚鎮糧臺收支總數摺

同治四年八月二十八日

奏爲查明揚鎮糧臺自同治三年二月初三日起至六月底止軍需收支總數開列簡明清單恭摺奏祈

聖鑒事竊准戶部咨同治三年七月初十日奉

上諭同治三年六月以前各處辦理軍務未經報銷之案准將收支款目總數分年分期開具簡明清單奏明存案免其造冊報銷等因欽此當經轉行欽遵去後茲據辦理揚鎮水陸糧臺報銷局前江甯藩司萬啟琛詳稱前奉

諭旨辦理揚鎮糧臺未到任以前係前代理江甯藩司候補道吳世熊暫行代辦自同治三年二月初三日起至二十一日移交接辦截至六月底止應由該司一手開報今查揚營糧臺接頂前辦糧臺陞任安徽巡撫喬松年移交並新收錢糧協餉釐捐等款其

銀六十四萬七千八百四十三兩八錢四分五釐八毫四絲八忽
四微二纖內除協濟濠勝營餉銀一千兩由該營自行造報外實
應入收銀六十四萬六千八百四十三兩八錢四分五釐八毫四
絲八忽四微二纖又錢二萬二千五百九十六千八百文官票十
四萬七千七兩米一萬七千七百三十二石五斗四升六合一
勻六抄鎮營糧臺接頂喬松年移交並新收協餉關稅釐捐等款
共銀五十九萬七千三百六十七兩二錢三釐六毫八絲九忽一
微一纖內除撥還滙餉銀三萬兩又解戶部補繳監生四成實銀
及代放廣東紅單船餉並京口等處防兵鎮江旗綠各營防兵薪
糧各省管解軍火委員借支盤費等款共銀十萬七千一百三十
一兩四錢九分二釐九毫三絲二忽應歸各處自行造報外實應
入收銀四十九萬二千三十五兩七錢一分七毫五絲七忽一微

一織又洋錢五元銀首飾六件計重四兩二錢三分據各委員將
支放實數詳報到局該司督飭局員逐款句稽悉心查核計揚營
糧臺實發過銀六十四萬五千二百七十一兩六錢三釐一毫四
絲二忽九織又錢二萬二千九百七十七千六百文官票四萬五千一
百二十七兩米一萬七千七百七石三斗三升三合九勺四抄實
在欠發銀十萬九千五百二十一兩二錢六釐八毫三絲九忽三
微一織欠發錢一千四百四十二千四百十文應歸下屆開除造
報又存銀一千五百七十二兩二錢四分二釐七毫六忽三微三
織存錢四百九十九千二百文存官票十萬一千八百九十兩存
米二十五石二斗一升二合二勺二抄應歸下屆支銷造報又鎮
營糧臺實發過銀四十八萬八千二百七十兩五錢五分六釐九
毫五絲七微八織實在欠發銀二十六萬三千五百五十六兩六

錢四分一釐五毫一絲七忽二微應歸下屆開除造報又存銀一千九百六十五兩一錢五分三釐八毫六忽三微三纖洋錢五元銀首飾六件計重四兩二錢三分應歸下屆支銷造報以上支放各款係按照江南江北歷次奏准題准章程辦理分別開單詳請具

奏前來臣查揚鎮兩軍分防江南北兩岸上年會合蘇軍攻克丹陽糧餉軍火所費不貲萬啟琛兼顧統籌分投支應無誤要需茲據開報各款臣確加覆核均係實用實銷並無浮冒應請存案免其造報現在該兩軍早經凱撤其自上年七月起至撤竣之日止已飭另行造冊報銷以清界限而符部議所有查明揚鎮糧臺軍需收支總數緣由謹會同漕運總督臣吳棠合詞具陳並開列簡明清單恭呈

御覽伏乞

皇太后

皇上聖鑒謹

奏

調楊鼎勳等軍赴徐宿摺

同治四年九月初八日

奏爲飭調楊鼎勳等軍分赴宿遷徐州聽候調遣防剿恭摺仰祈
聖鑒事竊楊鼎勳等援閩凱旋之軍暫駐鎮江俾資休息經臣於

六月二十三日陳明續奉八月十四日

寄諭令臣等酌量調派在案茲非曾國藩各商趁匪被剿由豫境

北竄現至山東曹考一帶各軍尾追迎剿均關緊要請由臣調派

蘇省大枝勁旅赴北路扼守派撥等情臣已檄飭遇缺提奏提督

蘇松鎮總兵楊鼎勳統領所部勦字等洋鎗隊八營由鎮江北渡

循運河東岸前赴宿遷曹紫遮蔽清淮再察度東省賊情及海贛

邳邳一帶地勢相機扼剿福建陸路提督郭松林已遵

旨回籍葬親該部松字等八營及現駐江甯之親兵桂字等三營

淮勇均飭拔隊前赴徐州聽候會國藩調遣接據探報捻逆將往

嘉祥鉅野之閒屯歇並欲由春開舊路渡運河竄濟兗各處新授
山東臬司潘鼎新以五營留濟設防自帶六營赴鉅野扼紮迎勦
曾國藩又由徐州添派各起馬隊並右江鎮總兵張樹珊所部樹
字各營赴濟會同潘鼎新合力防勦是東境兵力稍厚該逆被勦
窮蹙難保不圖竄東三府由東窺蘇而淮海門戶空虛臣飭楊鼎
勦於到防後妥爲布置潘鼎新楊鼎勦張樹珊及徐州各軍糧餉
軍火須由金陵蘇州籌濟全恃運河一綫設法轉運阻滯時虞艱
難萬狀瞬息冬令水涸尤應保護糧路自顧根本爲先著臣當隨
時會商曾國藩吳棠妥籌辦理所有飭調各軍分赴北路緣由理
合由驛馳陳伏乞

皇太后

皇上聖鑒謹

彙保克復嘉興常州等城員弁摺

同治四年九月初八日

奏爲遵

旨查明克復宜興荆溪溧陽等縣嘉興常州等府城及調撥江陰常熟無錫各城力戰解圍並截勦楊軍金壇賊殲除大股節次打仗出力之水陸各營文武員弁兵勇及團練餉得力官紳分繕清單彙案請獎恭摺奏祈

聖鑒事竊照同治三年正月二十四日克復宜興荆溪縣城又正月二十三、四等日官軍分進嘉興攻克賊壘大獲勝仗又二月初一日收復溧陽及二月內各路敗賊乘雨內竄攻撲江陰常熟無錫等城調派各軍援勦次第解圍連獲大捷又二月十八日克復嘉興府城擒斬偽榮王廖發受轟斃偽挺王劉得功餘匪悉就殲除又臣於三月初六、七等日督飭各軍四面兜勦將常熟楊庫一

帶竄賊殲除殆盡沿江腹地肅清又三月二十五六等日溧陽官軍截勦金壇竄逆獲勝擒斬偽酋多名殲滅大股又臣於四月初六日督飭各軍四面圍攻克復常州府城生擒逆首偽護王陳坤書餘眾全股撲滅以上七案歷次戰狀及克復詳細情形均經先後奏明其尤爲出力各員已隨摺奏蒙

恩獎此外出力員弁兵勇疊奉

諭旨准其查明彙獎恭錄咨行欽遵在案至蘇常上海等處及通州泰興沿江團練並籌餉各員或巡防得力或助勦立功或措置有方饋遞相繼自應隨案一併請獎茲准長江提督黃翼升江南提督李朝斌直隸提督劉銘傳福建陸路提督郭松林與各營統領並會帶常勝軍之戈登李恆嵩等及總局各司道先後查明彙保陸續開摺請奏前來臣悉心確核嚴加刪減分繕清單恭呈

御覽伏查嘉興爲蘇浙咽喉常州爲三吳鎖鑰賊以全力守之攻取非易當時陳坤書等分遣悍逆四出紛擾欲由江陰揚州沿江北竄並圖由常熟以襲太倉山無錫而撲蘇省其鋒甚銳金壇敗賊狼奔豕突若歸併金陵或旁竄他處我軍爲其牽制則辦必又費手仰賴

聖謨廣運

威德遐宣將士踴躍用命嘉興拔而杭州之賊勢始衰常州克而金陵之外援始斷實爲東南軍務一大關鍵其圍撲江陰常昭錫金之賊及金壇竄匪亦皆就地殲除不致以鄰爲壑水陸各營文武員弁及隨營襄事人員均屬異常出力今全省肅清論功行賞以臣請陋忝竊崇封在事各員自應秉公甄敘惟大小百數十戰水陸百數十營且係七案彙保人數較多不敢稍有遺濫合無仰

懇

天恩准予破格獎勵以昭激勸除擬保千總以下各弁及擬請藍翎六品頂戴各弁勇另行造冊咨部外所有遵旨查明節次出力員弁彙案開單保獎緣由謹繕摺由驛具陳伏

乞

皇太后

皇上聖鑒訓示再所保隨營各員到營均在二年以上至吏部章程保獎文員應將勞績明晰詳敘第各員事蹟甚多逐一臚陳未免瑣屑是以摘敘大略又劉銘傳郭松林楊鼎勳周盛波潘鼎新張樹聲各軍自去冬以來先後調援山東河南安徽福建各行南非分馳相去或數千百里軍務倥傯往返駁查有需時日是以彙奏稍遲合併聲明謹

奏

奏保王凱秦凌煥片

同治四年九月初八日

再浙江候補道王凱秦同治元年山編修經臣

奏調來營派辦臣軍營務處歷次隨臣督軍攻克蘇州常州等城

躬親行陣洞悉機宜復派綜覈釐捐籌濟餉需興利除弊能任勞

怨該員廉慤深穩皎然不欺其志洵為有體有用又道銜原保員

外郎凌煥曾由舉人考取學正其學問素稱淵博自元年三月隨

臣至滬久歷艱險贊畫戎機深獲其益於籌議通商事務尤思精

慮密力持大體該員操行耿介識略宏通迥非凡近所及查王凱

秦業經浙撫臣馬新貽於保舉賢才摺內奉

旨以浙江道員補用凌煥先於咸豐十一年揚防肅清案內由候

補主事經江甯將軍臣都興阿奏請以員外郎分部補用吏部旋

因新章不准保升京員指駁另核請獎該員淡於仕進是以隨臣

累年未爲保請官階不稱惟與王凱泰皆係臣營最爲得力之員未敢
沒其勞績合無仰懇

特恩准以浙江候補道王凱泰遇有浙江道員缺出請

旨併放道銜原保員外郎分部補用主事凌煥卽以道府

存記簡用出自

逾格鴻慈謹附片具陳伏乞

聖鑒訓示謹

奏

覆陳奉 旨督軍河洛摺

同治四年十月初八日

奏爲欽奉

諭旨恭摺陳仰祈

聖鑒事竊臣前奉九月初六日

寄諭令臣督帶楊鼎勳等軍馳赴河洛一帶防勦兼顧山陝門戶

飭與曾國藩等會商覆奏仰見

宵旰焦勞思慮豫防之至意臣當卽欽遵

諭旨函商曾國藩原擬俟兵餉大端籌有把握再行縷晰復奏旋

准曾國藩咨鈔九月十九日覆陳摺片內稱河洛現無可勦之賊

淮勇亦無可調之師李鴻章若果入洛豈肯撤東路布置已定之

兵挾以西行坐視山東江蘇之糜爛而不顧等語似屬切中事情

曾國藩因業經覆奏未及與臣覆信臣再四籌思彼覆疏中已陳

之言皆臣所欲言而不敢遽言之隱大局所關臣未便稍有立異

但不知批旨如何定見五中旁皇瞻前慮後仍有不能已於言者綜其大要約有三端一兵勢難遠分也我

朝從前武功專恃兵力此次軍務全資勇力臣初至軍營習聞周

天爵琦善向榮和春諸臣之議論皆謂旗綠弁兵馴謹而易調遣

各省勇丁桀驁而少紀律其不得已而用勇就地召募隨時遣汰

尙無甚流弊若遠調數千里外終必譁潰誤事咸豐初年廣西所

募潮勇最多向榮張國樑等帶赴江南沿途騷擾卒至十年三月

金陵之變一潰而遂不可收拾矣自曾國藩江忠源胡林翼李續

賓等創練楚勇不用一兵益深知綠營廢弛已久習氣太深萬不

足以殺敵致果而以楚將練楚勇恩信素孚法制嚴密又由湖南

北轉戰江皖一水可通人地相宜是以歷久而能成功然李續宜
唐訓方以楚勇勦淮北之捻劉長佑以楚勇勦直隸之騎馬賊均
未大著功效則以離鄉太遠南北異宜勇性未能馴服何能得其
死力曾國藩兄弟有鑒於此故金陵克復東南軍事將竣卽將所
部湘勇全數遣撤但屬臣暫留淮勇以備中原勦捻自係因地制宜
宜夫捻匪係皖豫東三省無賴糾合而成其隸皖籍者大都潁蒙
亳宿人皆在淮北臣籍隸廬州實在淮南所部淮勇則廬州六安
安慶揚州人居多皆濱江之處於長江上下防勦最宜軍士戰於
其鄉亦較得力其性情風氣與淮北迥殊同治元年臣初由安慶
赴滬湘勇以去路太遠多不願從乃商之曾國藩就臣鄉里團練
久戰之士選將東伍逐漸添募如程學啟劉銘傳潘鼎新張樹聲
周盛波等始僅爲營官帶數百人耳嗣因打仗可靠各增募至數

千人今遂爲淮勇最勁之兵究之用於江淮南北千餘里內必可指揮如意若遂漸調移山東河南邊境尙能勉強相從若遽遠赴河洛山陝並預備勦除京東馬賊甘肅回匪之用水土不習誠恐遷地弗良勇心渙散不獨素食穀米驟改麥麩一端爲可慮也且朝廷期望於臣欲以西北軍事相屬不過以臣在蘇粗立戰功而臣亦惟賴所部將士踴躍用命若令臣去而平素慣用之健將勁兵不得隨行臣復何能爲役曾國藩籌設徐州濟甯周家口等處防軍皆臣部最得力者臣若不調西行則聲勢不能大振若全調他往則東皖無以自立若另圖添募馬步而隨身先無親信可恃之兵勇必致敗軍償事而無裨於全局此兵勢不能遽分之實情也一餉源難專恃也凡欲滅賊必先治兵欲強兵必先足餉欲籌餉必先得人與地臣自咸豐三年至八年皆在皖北軍中竊見和

春鄭魁士之軍戰陣頗勇旋因餉缺而潰袁甲三翁同書等繼之更因餉絕而敗卽十年江南大營之潰十一年浙江之陷皆由於糧餉斷絕官文胡林翼蘇鄂餉以供東征曾國藩進圍江皖以江西湖南廣東釐金爲餉源左宗棠以浙餉辦閩浙之賊臣以滬蘇入款辦江浙之賊皆能自我爲政轉輸不匱幸而賊事從古至今言兵事未有不先籌餉者也

諭旨慮及皖豫髮捻一日不除盛京甘肅勢難兼顧滅以捻滅而後騰出餉需非徒捻滅而後騰出兵力有餉則到處兵勇皆可用無餉則已成勁旅亦無用也陶茂林雷正綰均係多隆阿部下百戰驍將昔何勇而今何怯其一潰再潰之故可知而知曾國藩夏聞奉

命勅捻

臣

忝署江督卽以後路籌餉引爲己任以安其心數月以

來分屯豫東蘇皖千餘里湘淮兵勇四萬餘糧運供支源源協濟
又兼辦蘇松揚州留防各陸營長江外海各水師皖南北江西防
期遣撤各湘軍之餉雖以入抵出不敷尙多竭力勻撥幸無貽誤
臣若奉

旨西征現在前路勦擒後路分防各軍之餉尙無專責之人卽臣
帶兵遠出餉源當屬於何處籌餉當責成何人亦未蒙

聖明指示若無確然可指之款率眾前行必爲雷正綰陶茂林之
續若非切實可靠之人維持後路亦無以安曾國藩與臣軍各將
士之心臣當默籌熟計目今大患在捻與回自須先圖滅捻若以
現餉養現兵約計河南可養戰士一萬五千山東可養戰士二萬
安徽可養戰士一萬江蘇可養戰士六七萬湖北可養戰士四五
萬各省督撫果皆熟諳略認真籌餉練兵使一兵得一兵之用

通力合作勿存推諉爭忌之心則兵與餉可漸足一二年間可奏效若

皇上專派督勦大員而各督撫辦事有專屬或擁兵觀望或玩視軍需或勝則爭功敗則諉咎遂使客兵出境種種牽掣亦難必其收功之遲速矣臣若赴豫欲圖兜滅此捻必須多練馬隊以備衝突廣置車騾以資轉運需餉甚鉅豫中蹂躪已久力難供應若專指蘇餉目下蘇滬稅釐分供前敵淮軍已成仇讐再添募馬步人數益眾道路益遠勢必不支臣一經離任恐亦不能遙制此餉源不能專恃之實情也一軍火難常接濟也臣軍久在江南勦賊習見洋人火器之精利於是盡棄中國習用之擡鳥鎗而變爲洋鎗隊現計出省及留防陸軍五萬餘人約有洋鎗三四萬桿銅帽月需千餘萬顆粗細洋火藥月需十數萬斤均按月在上海香港各

洋行先期采買陸續供支臣每親自料理又有開花礮隊四營一
爲潘鼎新帶往濟甯一交劉秉璋鎮守蘇州其副將羅榮光劉玉
龍兩營爲臣親兵現分守金陵城外之下關江東橋兩處江口綠
洋人最重開花礮日下長江通商番舶來往奸人覬覦偵知有此
利器可稍奪凶魄洋礮重者千餘斤輕亦數百斤其礮具之堅精
藥彈之繁完臣講求數年稍窺秘要他人多未及見更未與知臣
既辛苦練成若出省臣師必須酌量調往稽壯聲威惟礮隊所用
器械子彈盡仿洋式所需銅鐵木煤各項工料均來自外國故須
就近設局製造蘇州先設有三局嗣因丁日昌在滬購得機器鐵
廠一座將丁日昌韓殿甲兩局移併上海鐵廠曾經
奏明欲再移設金陵附近濱江偏僻處所爲久遠之計但事體繁
重須有精心果力者主持其事方冀漸收功效臣若遠赴他省則

礮局與鐵廠久必廢弛不但技藝不能漸精且慮工需多有缺乏而臣軍接濟亦將有斷絕之時臣部將士皆已熟習洋器慣用礮賊設此後臨敵不能應手或遠道解運不及將若之何臣與洋將共事數年彼視軍火鎗礮爲行軍第一重大之事中國將領往往隔膜置之無怪軍威不能自振臣軍所向則以此爲命脈關係誠不敢輕以付託此軍火恐不能常接濟之實情也臣所慮者只此三端儻蒙

皇上天恩俯憫愚忱熟思審處俾微臣帶兵遠出日後更無掣肘之患臣得效命疆場努力設謀剴同曾國藩等爲國家殲此殘寇雖萬死有所不辭臣知曾國藩陳奏在先久未續

奉

諭旨敢再冒昧披瀝上陳伏乞

皇太后

皇上聖鑒訓示謹

奏

江北新漕民折官辦摺

同治四年十月初八日

奏爲會籌江北新漕民折官辦分別解運情形恭摺覆陳仰祈

聖鑒事竊臣等承准軍機大臣字寄同治四年八月二十五日奉

上諭戶部奏江浙來年海運請飭催趕辦一招江北久經肅清各

屬本年新漕應卽徵收本色埽數起運惟本年河運係封雇民船

誠恐米數太多不無掣肘如江北全漕不能概由河運卽由該省

酌量情形劃分成數河海並運一切章程趕緊妥議奏明辦理等

因欽此遵經轉飭代理江甯藩司勒方鈞署江安糧道李鴻裔妥

議籌辦茲據會詳前來伏查江北淮揚徐通四府州屬額徵起運

漕米十六萬餘石本年淮揚等處夏旱秋澇被災較重尙未勘定

分數約計可徵米九萬餘石竊自咸豐三年以來運道不通漕船

盡壞應徵漕米均經

奏明飭屬變價分解揚徐各糧臺充餉各州縣因徵米既須變價
卽按逐年米價折收錢文易銀解臺臣業於試辦河運時將各省
漕糧因軍需孔亟先後改徵折色之處附片陳明在案今年揚防
盡撤欠餉已清臣鴻臚曾豫飭司道本年漕價必應全數解京雖
有急需不得援例截留以實部庫惟江北漕價部定每石折銀一
兩四錢嗣糧臺因米價日增軍餉日絀歷年飭令加增各州縣以
收錢盈餘並節省軍費等項全數捐解充餉每米一石解銀二兩
四錢當年務緊急之時民間咸知爲

天庾正供竭力報效官民相安十餘年來從無鬧漕抗糧之案今
若改徵本色民間完米既慮弊端百出而以米運京之費一無所
措本年試辦河運每米一石所用船價耗米運腳經費屆挽繚纜
帶片及通倉經紀箇兒錢等項約其需銀二兩數錢民間完納漕

糧旣不能違例加收運費州縣徵米起運亦不能勒令賠貼解資
則此每石運費二兩數錢臣等實無從挪墊至本年蘇松起運漕
米可較上屆加增海運沙船無多正虞不敷裝運勢不能加入江
北漕米則江北之漕仍須另籌河運臣等往返兩商並督飭司道
各員再四熟籌惟有仿淮徐等屬民折官辦章程變通辦運本屆
江北全漕約米九萬餘石擬請令各州縣照舊每米一石折收銀
二兩四錢全數解司以一半按部定例價每石作銀一兩四錢先
行解京其餘一半派員於米糧薈萃之區分投采買江北粳米無
多米色不能一律仍照試行章程紅白兼收粳籼並買約計米價
每石需銀二兩有餘以一半解部例價外之節存銀一兩又益以
例支漕項行月贈五給丁等銀作為一半河運之費計尙不敷再
由外設法籌補事竣分別報銷此次雇用民船並起運事宜容臣

等參酌上屆試辦河運章程續行妥議具

奏所有遵

旨會議辦理情形合先恭摺覆陳伏乞

皇太后

皇上聖鑒訓示謹

奏

請飭議新漕全數解折片

同治四年十月初八日

再查此次籌辦江北新漕采買運京權宜試行尙未知能否應手
南漕停運已久大亂之後亟應與民休養一旦改議徵收起運各
有為難謹為

皇上懸陳之漕弊積久愈深大略不外於丁胥遞事誅求幫兌互
相魚肉究其受害最切厥維小民道光閒諸臣章疏

宣宗諭旨言及州縣浮收旗丁幫費未嘗不深恨次骨終以積重
難返無可如何道光二十七年王大臣戶部議將南漕改徵折色
以贖部庫而甦民困為前督臣李星沅奏駁未行咸豐元年江蘇
撫臣傅繩勛力陳浮收幫費弊端請收折色又經部科議駁蓋以
數百萬之米易銀則銀必貴以數百萬之銀易米則米亦必貴皆
不敢輕為嘗試迨至時勢所迫改為折色數十年鋼弊不期除而

自除凋瘵之民於以少得休息今若重收糧米必致諸弊復萌夫
小民之情減則順而加則逆稍有抑勒勢將難堪軍興十有餘年
闕闕瑣尾流離不忍徧視雖有完善之處而官捐私借畝費抽釐
幾無一歲能寬亦無一家得免困苦至此非大培元氣不特瘡痍
莫起兼慮鋌險生端旁觀者謂完米完錢並無二致何以折色易
而本色難不知徵收折色照部定每石折銀一兩四錢必不敷買
米之數州縣所收縱有增益民間以部價相衡斷不能加至倍蓰
卽如江北近年折至二兩四錢已較江楚各省爲多然照市價亦
僅能買米一石耳民間輸納較易力量較省若令備米交倉則向
所謂錫斛淋尖風篩打樣以及併合包勻各種苛勒乘機而來紳
士包漕棍徒攬抗亦聞風自起民間以米上兌有一石完至數石
者更有由單鋪席掛號抽門等項訛取錢文米色與銀錢不同明

屬潔淨乾圓何難指爲醜米格外需索更屬防不勝防是完收本色總較現在折收之數有增無減近日民力實有不逮江北尙屬一隅之地旣收本色將來須推及兩楚江西而江楚漕折較江北爲減收米必更掣肘似應寬以數年之力俟各省軍務大定防軍全撤次第籌酌舉行驟議改徵恐滋事故此所謂徵收之難也至於起運南糧唐代用轉般法沿水置倉由江而淮而汴遞輸於官宋崇甯中改爲直達明季置屯衛我

朝因之今漕船盡廢欲全數修復約需銀三千萬兩若轉般之法必先建倉南漕正耗四百餘萬石以一倉儲萬石計之須四百餘倉一時均無此鉅款浙蘇海運屢屆幸安乃近年北口通商各貨爲洋船攬載沙船生意淡薄減歇之後尠朽過多本屆蘇浙之漕尙慮不敷裝運斷不能益以江北之米卽原運之數亦恐此後海

船日少不能不預爲熟籌則惟有仿直達之策以民船代漕艘較爲近便臣棠本年試行河運原欲爲先事之導以濟海運之窮雖已挽運抵通而運費不貲雇船亦極艱苦卸米之後尙無回空日期聞山東戴村壩復決河水洩枯濟甯以上乾涸已多前船年內不歸則來年需用之船必致無人受雇且近來勦擒各軍皆由運河轉運軍裝餉米兵差日多民船日少雇價日重沿途之偷竊運道之阻滯在在堪虞只可強試一行而米數必不能多遲速必不能定此所謂起運之難也有此二難若欲解運本色漸復舊規固非咄嗟可辦卽采買雇船耗費滋多亦非經久之策臣等籌思至再力爲其難本年江北之米仍擬照上年試行河運章程再行試辦而以半折半運通融用費冀稍彌補而免貽誤若半銀之數不以例價解京則少每石一兩之節存半米更不能起運近時捻蹤

飄忽往來運河左右蹤跡靡常內河船隻愈見稀少屆期能否履
寬齊全及運行無阻之處常隨時察看情形

奏明辦理抑臣等更有請者此次漕米運至通州連米價及運腳
雜費每石總須合銀四兩數錢無可再省本屆蘇浙海運稍多京
倉儲備亦稍裕似不爭此四五萬石之米且因此修理沿途壩壩
挑濬長河耗費更鉅尤爲不值莫若全數解折省出運費每石可
實折銀二兩四錢在津並買米填倉既可有益無絀卽以之抵放
俸甲亦得實惠均霑似於

國計不無裨益並請

敕下部臣迅速通籌妥議核覆飭遵理合據實附片陳明仰祈

聖鑒訓示謹

奏

徐屬冬漕循舊折價充餉片

同治四年十月初八日

再本年正月開臣吳棠以徐宿捻氛未靖

奏准將徐屬本年地漕仍解徐餉在案茲奉

諭旨江北各屬本年新漕應卽徵收本色仿照河運成案掃數起

運等因欽此查漕糧爲

天庾要需自應一律酌徵籌運惟徐宿餉源本極支絀原撥東豫

陝晉四省協餉均已停解徐屬地瘠民貧蹂躪已久錢漕徵數無

幾全供防軍不敷甚鉅現在捻逆大股由東境回竄逼近徐城防

勦萬分喫緊軍士枵腹荷戈尙賴屬徵地漕稍資接濟若併此有

苦要款提解京倉匪惟以後軍需無從設法卽此時征兵緊餉何

以支持惟有仍將本年冬漕先其所急循舊折價解充軍餉方免

飢軍譁潰之虞據徐海道張樹聲詳請敷

奏前來

臣

等復

加體察

委

係實

在情形

合無

仰懇

天

恩俯念

徐宿防

務喫緊

待餉孔

殷准將

徐屬本

年冬漕

循舊折

價解充

徐餉以

繫軍心

一俟捻

氛肅清

再籌起

運出自

逾格鴻

慈理合

附片陳

明伏乞

聖鑒訓

示謹

奏

奏

聖鑒

訓示

謹

奏

李宗羲吳坤修請緩

陛見片

同治四年十月初八日

再江甯布政使李宗羲安徽按察使吳坤修奉

旨簡授今職例由該員等具摺謝

恩奏請

陛見惟查江甯省城克復未久察吏安民事事更始又有清查田畝籌捐濟餉諸大端其責在藩司者較前更形繁劇道員勒方鐫代理四月雖無貽誤究不若實缺人員呼應更靈至吳坤修向帶團防營駐紮蕪湖現暫署皖南道篆擬俟徽甯開餉各勇遣撤事竣再會商曾國藩飭調安慶防兵王可陞所部五營分紮甯國蕪湖騰出團防兩營由吳坤修帶赴安慶布置省防以資鎮壓是該二員於地方防務均關緊要一時遽難交卸入都可否仰懇天恩准令李宗羲吳坤修先行各赴新任暫緩

陸見以重職守之處出自

聖裁謹會同暫護江蘇巡撫臣劉郁膏安徽巡撫臣喬松年附片

陳請伏乞

聖鑒訓示謹

奏

京營官弁學製開花礮子請獎摺

同治四年十一月初八日

奏爲京營官弁學製西洋開花礮子已有成效仰懇

天恩准照存記前案給獎恭摺奏祈

聖鑒事竊臣於同治三年十二月二十七日在蘇州巡撫任內具

奏京營官弁學製西洋火器漸有成效懇

恩獎勵一摺於同治四年正月十五日奉

旨知道了薩勒哈春等均著暫行存記俟續有成效再行奏請獎

勵欽此當卽恭錄行知該官弁等一體欽遵並飭奮勉學習嗣於

上海新購機器鐵廠設立製造總局復奏明將參領薩勒哈春等

暨卽補副參領色布什新等各帶兵二十名分派蘇滬兩局就所

有機器互相觀摩期於外洋礮火祕法實有所獲惟機器奧妙精

深礮法尤精之又精卽在外洋巧匠亦不易得該弁兵等竭其心

力以從事或限於天資之不齊現在甫經設廠凡製器之器中國
員匠均須逐漸操習原不能剋期求效但飭該弁兵等朝夕在廠
與中外工匠雜作臣督同各委員時加策勵或者日計不足月計
有餘溯自該弁兵等到局之初臣以行軍攻剿所需莫要於開花
礮子一項卽令該弁兵等專力先攻此件前因已得要領曾經奏
請先行獎敘以勉其已能而策其未能自奉

聖恩記獎以來數月之間實力研究所有開花礮子之內模外胎
鏗光鉸口釘絡旋盤以及裝做彈心木引等事均能按法承造復
遵總理衙門劄飭自行具稟將所習各件開具清單由臣處遞京
察核接准總理衙門回文以其辦理尙屬認真足徵該弁兵等所
學已有進益再能於機器鑄礮之法漸入門徑自可有裨實用竊
以循名責實一得未許其自封而善善從長利用必資於鼓舞前

奉

諭旨以該弁兵等學習炸礮炸彈各種軍火機器如有成效准該撫從優奏獎等因欽遵在案謹查照前次開列銜名繕具清單恭

呈御覽合無仰懇

天恩准照存記原案給獎以爲激憤發排之助庶收日新不已之功其烏鎗護軍校玉慶七品頂戴高鎗長吉崑先後病故局員從九品邵有源業經撤差以上三名均應扣除保案烏鎗護軍校常英一員原保擬以烏鎗護軍參領卽補未免過優應改請以委烏鎗護軍參領卽補除於清單內分別刪正外所有派習火器官弁學製開花礮子已有成效懇

恩准照存記原案給予獎勵緣由專摺由驛具

奏伏乞

皇太后

皇上聖鑒訓示謹

奏

海運回空沙船請免北稅摺

同治四年十二月初三日

奏爲蘇浙海運回空沙船裝貨請免天津牛莊關稅以廣招徠恭摺仰祈

聖鑒事竊照蘇浙海運漕糧歷係上海沙船承雇裝載由滬運津向無貽誤沙船生計以北洋豆貨爲大宗自爲外國夾板船攘奪其利沙船日就疲乏無力出洋大半廢擱今屆漕數較增不敷雇

用京儲根本攸關亟應綢繆未雨上年臣在蘇撫任內奏奉

諭旨准令此項沙船販運奉省雜糧本年復將上海助餉船捐全行蠲免總理各國事務衙門議辦北洋豆稅欲令洋船成本稍重隱留華船地步中外合籌無非預爲補救起見然奉省雜糧經部議定應交稅課其豆稅須華洋並收方可開辦是南捐甫減而北

稅驟增誠恐商力仍未能紓運局究無大補與籌救之初意不符
在該船承運

天庾正供往返海洋與自行販運者本有不同若查明運卸回空
船隻裝貨南下時准其免交北稅既於體恤之中仍示區別而華
商得以邀免子稅洋商亦無從藉口先准總理衙門公函籌商並
以糧船向有帶貨二成免稅成案今議回空全行免稅其南省如
何給照爲憑北省如何稽查影射應由臣與三口通商大臣臣崇
厚會商妥議奏辦等因當經彼此鈔函知會由臣鴻章飭據江海
關道會同海運局員查議稟覆前來覆加酌核緣運漕海船自南
省裝米到津必須津局收漕方知其交卸是否無誤若由南預給
回空免稅執照不特易生影射且恐北地稽查爲難擬請明年海
運漕船到津米石交清卽由津局蘇浙糧道分別填給該船原裝

漕米若干石某日交清准在天津牛莊自運回貨全行免稅印照持赴天津牛莊各關呈驗放行其交米未清之船概不給執以杜拖欠此議係專爲體恤沙船維持海運起見今屆船不敷用必須兼雇甯波等處船隻該船雖與沙船情形不同而運北回南並無殊致應請一律准予免稅其重運帶貨二成免稅事宜仍照舊章辦理與現議回空裝貨全免北稅各爲一事不相牽涉至於北省如何稽查之法崇厚查天津戶關向不徵收豆貨雜糧均歸天津道所轄海關抽收亦係徵收進口者居多其出口豆貨雜糧總以牛莊一關爲大宗應如何嚴查影射等弊屆時當轉飭山海關監督及天津道認真稽核毋令奸商假冒偷漏其該漕船所免前項稅款仍由天津牛莊各關作正開除以重課額計明春兌運在邇必須先事籌定合無仰懇

天恩俯准照辦俾免遲誤除分咨外所有蘇浙海運回空沙船請
免北口豆貨雜糧各稅緣由謹會同三口通商大臣臣崇厚恭摺
由驛具

奏伏乞

皇太后

皇上聖鑒訓示謹
奏

龐際雲請准補鹽道摺

同治四年十二月初三日

奏為江南鹽巡道員缺仍請

恩准補授恭摺仰祈

聖鑒事竊鹽巡道缺前經臣等請以遇缺卽補道龐際雲補授奉旨交吏部議奏頃准部咨該員尙未赴部引

見核與章程不符應令另揀合例人員請補等因應卽遵照辦理

惟查江蘇省現無合例及人地相宜之員該員龐際雲自上年隨

督臣曾國藩至金陵派辦善後諸事經理裕如迨冬閒舉行鄉試

復經臣派充內提調官倉卒之中悉臻妥洽現金陵善後雖已粗

立規模而地方彫瘵未蘇一切需員佐理江南省城實缺司道惟

藩司及糧鹽道各一員藩司政務殷繁糧道須出省督運鹽巡道

有巡守地方之責該員督率講求有素老成精細穩慎廉明允稱

職守因保留江蘇後未經引

見與例稍有未符惟查該員以咸豐壬子科庶吉士散館改刑部主事及八年熱河差滿回京凡曾三次引

見多年京秩保升道員與在外疊次保舉從前未經引

見者不同人地實在相需例得據實請

旨可否仰懇

天恩仍准以龐際雲補授江南鹽巡道缺俟善後事竣再行給咨赴部引

見俾資臂助臣爲地方吏治起見謹繕摺具陳伏乞

皇太后

皇上聖鑒訓示施行謹

奏

張樹聲在營起復片

同治四年十二月初三日

再徐海道張樹聲前於咸豐十年十二月十三日在籍丁父憂不計開扣至同治二年三月十三日服滿由臣咨報起復曾經吏部駁查以該員留營當差並未奏明有案行令回籍補孝百日由原籍呈報服滿等因臣查該員張樹聲以廩生候選知縣在籍辦團於咸豐十年十二月丁父憂曾在安徽軍營呈請咨部自同治元年正月督臣曾國藩飭該員招募勇樹字營隨臣赴滬計已在籍見喪穿孝一年有餘臣前在安慶募勇成軍事草創漏未將該員奏請留營然該員抵滬後率隊剿賊攻克蘇浙各郡縣無役不從經曾國藩及臣在江蘇巡撫任內奏報戰狀不下數十次由知縣存保至二品頂戴遇缺提奏按察使均奉

諭旨允准本年五月捻股南竄徐州戒嚴新改徐海道一缺非向

構知兵長於戰守之員斷難勝任曾國藩與臣等會商請以該員
借補弁令帶兵赴任原以爲缺擇人也現雖伊弟右江鎮總兵張
樹珊代領所部進駐河南之周家口而該員仍在徐州總辦營務
整飭堡團條理秩然正資臂助未便遽飭交卸回籍轉滋貽誤復
查該員前在原籍穿孝年餘業已不止百日本可毋庸補制況四
月閒吏部續定章程從前札調丁憂人員如係打仗出力未經奏
明者亦准補行奏留由營起復相應遵照新章奏請
敕下部臣准將徐海道張樹聲就近在營起復毋庸回籍再行補
孝實於軍務地方兩有裨益理合附片陳請伏乞

聖鑒訓示謹

奏

上海裁撤會防局摺
同治四年十二月十九日

奏爲上海裁撤會防局仍練兵接防要地恭摺具陳仰祈

聖鑒事竊據督蘇松太道應寶時稟稱咸豐十一年冬間上海賊

氛環逼籌議中外會辦防剿經江浙紳士呈由前撫臣薛煥奏奉

上諭江浙紳士請借英法官兵剿賊上海爲通商要地自宜中外

同爲保衛著與英法兩國迅速籌商辦理但於剿賊有裨朕必不

爲遙制等因欽此經前蘇松太道吳煦與各官紳會商舉辦先於

十一年十二月十四日在洋涇浜設立會防公所與英法提督領

事各官籌商防剿之策開築濠牆建造礮臺一面添練礮勇隨同

西兵四出攻擊並支應夫船糧草食物以利軍行嗣又雇備輪船

迎接臣軍東下迨同治元年三月大軍莅滬整兵籌餉屢克名城

未及三年肅清全省卽於上年四月間遵劄將洋涇浜會防公所

停撤仍留分局數處併歸蘇松太道衙門兼辦以備支應現在英法在滬防兵均已回國會防分局於本年十一月底全行裁撤又吳淞口原有法國防兵駐劄由該處團防局董事辦理支應本年七月間亦將供應全停裁捐撤局計自十一年十二月開辦會防至今閱時四載所用經費悉在本局捐款項下支銷並未動用正項合將會防撤局緣由稟祈察核

奏各等情前來臣查從前上海會防局之設緣時勢危迫不得不籠絡洋人薛煥原奏內卽已聲明只可謂一時權宜之計究之中西兵弁實不能在一路會期致受牽制先是西兵克復青浦嘉定二縣旋得旋失待官軍再舉而後定自嘉定復後進攻蘇屬各城惟戈登率常勝軍以從英法弁兵總未離滬城一步是以臣軍抵滬數月卽經會防原紳馮桂芬潘曾瑋等呈請撤局維時臣以戰

事方亟上海係後路根本西兵屯駐城內外索應月糧房租夫價需費甚鉅既相習爲固然未便遽翻前說致生他數因暫留會防一局稍示羈縻迨至蘇常肅清金陵告捷彼族無可藉口英法駐滬之兵以次撤退自上年八月起丁日昌應寶時等與該提督領事再四商催始將歷年占住上海學宮城隍廟園及大境青蓮庵諸處陸續讓還節經咨明總理各國事務衙門從此滬城風氣一清界限分明實皆仰賴

朝廷德威所被事機十分順手而曾防局從容蒞事亦得有始有終殆非該局官紳始願所及計三四年來動用經費爲數不貲悉就華商設法籌捐於本年二月奏報軍需清單內已聲明此項應歸外銷再英法未撤兵之先據英領事巴夏禮以上海係通商最要口岸須由中國練兵接防該公使復向總理衙門瀆請臣

卽酌留上海城南高昌廟法國教練勇四百人鳳凰山英國教練
勇千餘人仍揀派英法武弁各數人分司教習令由中國官統帶
並派記名總兵鄭海鼇帶淮勇親兵一營赴鳳凰山駐紮兼統教
練各營會同上海道節制調遣其勇丁口糧章程改照楚軍營制
按月由關稅內撥給外國弁兵止管教習鎗礮不准干預營務並
與該領事等議明此後該軍進止機宜與洋弁應否撤換之處悉
由督撫統兵大員主政以重海防而肅體制所有裁撤上海會防
局仍練兵接防各緣由理合繕摺由驛具陳伏乞

皇太后

皇上聖鑒謹

奏

應寶時請補蘇松太道片

同治四年十二月十九日

再臣欽奉同治四年八月十四日

寄諭蘇松太道員缺前已有旨令應寶時署理如果勝任卽著李鴻章奏請實授等因欽此查江蘇補用道應寶時浙江舉人咸豐三年考取國子監學正學錄改就本班直隸州州同分發到蘇歷由海運團練及克復城池各案洵保令職

賞戴花翎該員在滬年久自辦理會防以來更歷事變熟悉洋人情偽先經

臣

奏派通商隨員上年二月本年六月兩次委令代理蘇松太道篆務當以該員勤幹廉明遇事持平得體奏蒙

聖鑒在案自奉

特旨署理斯缺數月以來籌辦洋務及稅餉地方一切事宜均臻

安治惟洋人多方譎詐有非可以情理範圍者臣詳加隨事稟由臣詳加
審度剛柔相濟期於調劑得宜不致貽誤察看該員尙堪勝任所
有蘇松太道員缺可否卽以應寶時補授之處出自

天恩理合遵

行擬陳伏乞

聖鑒訓示謹

奏

王大經請准加鹽運使銜片

同治四年十二月十九日

再署理江蘇按察使候補道王大經前於同治二年十月克復太倉等城出力案內彙保奉

旨賞加鹽運使銜嗣准部咨以該員係安徽道員查照定章軍務省分人員如有經別省因勞績保奏者一律議駁王大經所保升銜應卽撤銷行令迅速赴省等因查該員王大經由浙江舉人咸豐三年以知縣揀發安徽歷在皖北軍營保升道員同治元年五月經臣附片奏調奉

旨赴江蘇軍營差遣三年三月復經臣以安徽並無外補道缺援案奏請改發鄰近軍務省分奉

旨著改發江蘇歸原班補用吏部知道欽此是該員前至安徽已歷八年其調赴臣營係奏奉

諭旨允准旋又奉

旨改發江蘇自無須再赴安省亦不應撤銷保案現委署臬司辦事實心勞績久著相應籲懇

天恩仍准

賞加鹽運使銜以示鼓勵理合附片陳明伏乞

聖鑒訓示謹

奏

李文忠公奏稿卷九